

Köp më Emuth na Bër i kom Yecu kite na Jon öcöö

Köp na tye i buk ka Jon

Köp më Emuth na Bër na Jon öcöö nyutho Yecu na calö Köp k'Obanga na bedo na twal, n'ödökö “dhanö ëka obedo i kin onu.” Ën öcöö kî i Epeco na calö caden i kom gin na ën önënö i kin mwaka 90-96 AD.

Kite na buk kikome kobo nî buk ni ëcöö ëk jö na kwanö twërö yee gîni nî Yecu ënë Meciya, Wod k'Obanga, ëka nî pî yeegî i kome gîn myero onwong kwö na ba thum (Cura 20:31). Buk ni tye kî köp na nyutho Yecu na calö Köp, n'odonyo i lobo onu na calö dhanö ëka thon “Ngat na miö kwö” më wi lobo n'obedo tye na bara cwec ötimërë. Jon okobo köp na pol i kom tango ka Yecu, ëka lwëny mërë k'ëtëla k'Eyuda na ba yee gîni. Cura 13-17 kobo köp i kom wat ka Yecu k'ëlübkörë ëka köp mërë më cükö cwiny bothgî i karë më kothyeno na bara ëmakö ën.

Na Matayo tye ka kobo nî Yecu na calö Meciya k'Eyuda, Marako ëka Luka kobo gîni Yecu na calö atic k'Obanga ëka dhanö, Jon kobo nî Yecu eoro kî both Apap mërë ëka onwongo tye kanya acël ködë. Jon otio k'anyuth më jami më kwö më nînö kî nînö më cîmö kite më cwiny kikome, na calö pii, ogati, tar, akwath ëka rom mërë, ölöc ëka nyige, yoo, adyer ëka kwö. Jon onwongo mitö mëdö köp ni i buke më köp më Emuth na Bër nökënë ca, ën

ömedö jami na pol na ba ekobo i buke nökenë gini. En ba onwö rwök gin na jö nökenë otwakö cön.

Jon 3:16 ecwodo ni “Köp me Emuth na Ber i gin na mor” pien tyeng non titö köp i kom cwiny me dini k'Ekiricito: “Obanga ömarö jö me lobo ni rwök, cë ömïö Wode acël këkën, ëk dhanö acëlacël na yee i kome kür öthöö, ëntö onwong kwö na ba thum.”

Köp ödökö dhanö

¹ I acaki, Köp onwongo dong tye, Köp onwongo tye kanya acël k'Obanga, ëka Köp onwongo obedo Obanga.

² Köp onwongo tye kanya acël k'Obanga i acaki.

³ Obanga ocweo jami kibëc ki Köp, ba tye gin mörö n'ecweo abonge ën.

⁴ Kwö onwongo tye i ën, ëka kwö non okelo tar both jö kibëc.

⁵ Tar ryëny i piny na cöl, ëntö piny na cöl ba jükö tar me ryëny.*

⁶ Ecwö mörö onwongo tye n'Obanga ooro na nyingë Jon.

⁷ En obino me bedo caden me kobo köp i kom tar non, ëk jö kibëc oye gini pi köp me caden mërë.

⁸ En kikome onwongo ba obedo tar; ëntö ën obino na calö acaden me kobo köp i kom tar.

⁹ Tar me adyer na kelo tar both jö kibëc onwongo tye ka bino i lobo.

* **1:5 1:5** Baibul nökenë kobo ni piny na cöl ba öniang ië.

¹⁰ Köp onwongo tye i lobo cön, ëka kadï bed Obanga ocweo lobo ki Köp ëntö jö më lobo ba ongeö ën.

¹¹ Ën obino both jögë, ëntö gïn ba ögamö ën.

¹² Ëntö jö kibëc n'ögamö ën nakun oye gïni i nyïngë, ën ömïögï twër më bedo ëthïnö k'Obanga—

¹³ ëthïnö na ba ënywölögï ki remo onyo ki miti më kom, onyo ki miti ka dhanö, ëntö pï twër k'Obanga.

¹⁴ Köp ödökö dhanö ëka obedo i kinwa. Wan ënënö dheo mërë, na röm ki dheo ka Wode acël këkën n'öya ki both Apap, n'obedo akïca ëka twakö köp adyer.

¹⁵ Jon okobo caden i kome. Ën oredo ni, “Man ënë dhanö n'onwongo an atwak i kome: ‘Dhanö na tye ka bino ki kora dit na löa ökö pïen ën öcakö bedo tye nïna.’ ”

¹⁶ Ki i kom kïca mërë n'opong, ën ömïö gum both onu kibëc, kïca i kom kïca.

¹⁷ Obanga ömïö Cïk nakun wok ki both Muca; ëntö Yecu Kiricito ënë okelo kïca ëka köp adyer.

¹⁸ Ngat mörö ope na naka yam önënö Obanga, ëntö Wode acël këkën, na röm aröma k'Obanga ëka na cwök k'Apap, ënë ömïö Obanga ongere.

Caden ka Jon Abatica

¹⁹ Man ënë köp më caden na Jon okobo i karë n'ëtëla k'Eyuda më Jerucalem ooro gïni ëlamdhök ëka Alebi më cïdhö penyo Jon nga na ën ebodo.

²⁰ Ën ba ökwërö më gamö, ëntö otuco kanyalër na kobo ni, “An ba abedo Meciya.”†

† **1:20 1:20 Meciya** gönyö ni Kiricito i lëb Girik, gönyö ni, Ngat n'ewiro.

²¹ Gĩn openyo Jon dõkĩ nĩ, “Cẽ in ibedo nga? In ibedo Eliya?”

Ën okobo nĩ, “An ba abedo.”

“In ibedo Adwarpĩny?”

Ën õgamõ nĩ, “Pe.”

²² Cẽ ì ajiki gĩn openyo Jon nĩ, “In dong ibedo nga? Mĩĩwa enge ãk ãdwõk kõp both jõ n'oorowa. Ngõ na in ãtwërõ kobo ì komi?”

²³ Jon õgamõ kĩ kõp k'adwarpĩny Icaya nĩ, “An abedo ‘dwõn dhanõ na tye ka redo ì thim nĩ, mĩĩ unu yoo ocung atĩr nĩ Rwoth.’ ”

²⁴ Cẽ Eparicayo n'onwongo eorogĩ

²⁵ openyo gĩnĩ Jon nĩ, “Pĩngõ in itye ka batica jũĩ ka in ba ibedo Meciya, onyo Eliya, onyo Adwarpĩny?”

²⁶ Jon õgamõ nĩ, “An abatica kĩ pii, ãntõ dhanõ tye n'ocung ì kinwu na un ba ingeo.

²⁷ Ënẽ ngat na tye ka bino kĩ kõra, an ba apora mẽ gönyõ thõl wõrẽ.”

²⁸ Jami nĩ kībēc õtĩmërẽ ì Betania yo lõka kulo Jordan, kanya Jon onwongo batica jũĩ ãẽ.

Athĩn Rõmõ k'Obanga

²⁹ Kodiko mërẽ Jon õnẽnõ Yecu ka tye ka bino yo bothe ãka okobo nĩ, “Nẽn unu, Athĩn Rõmõ k'Obanga, na kwanyõ bal ka jõ mẽ lobo!

³⁰ Man ãnẽ ngat na an akobo nĩ, ‘Dhanõ na tye ka bino kĩ kõra dit na lõa õkõ piẽn ãn õcakõ bedo tye nĩna.’

³¹ An kikoma ba angeo ãn, ãntõ tyẽn kõp n'õmĩõ an abatica kĩ pii onwongo obedo nĩ ãk ãn myero ongere both jõ Icarael.”

³² Cē Jon ömïö caden ni: “An anënö Tipo Naleng ka tye ka bino pïny kî i polo calö amam ëka opye i kome.

³³ An kikoma onwongo ba angeo ën, ëntö Obanga n'oorä më batica jii kî pii okobo nïna, ‘Ngat na in ibino nënö Tipo Naleng bino pïny ëka pye i kome ënë ngat na bino batica kî Tipo Naleng.’

³⁴ An anënö ëka akobo köp më caden nï man ënë Wod k'Obanga.”

Ēlūbkör Yecu më acël

³⁵ Kodiko mërë dökî, Jon onwongo tye kanya acël k'ëlūbkörë ariö.

³⁶ I karë na ën önënö Yecu ka tye ka wok, ën okobo nï, “Nën unu Athïn Römö k'Obanga!”

³⁷ I karë n'ëlūbkör Jon ariö owinyo ka ën tye ka kobo köp ni, gin ölübö kör Yecu.

³⁸ Yecu ölokërë önënögî ka tye ka lübö ën ëka openyo nï, “Ngö na un imitö?”

Gin ögamö nï, “Rabbi (na tyën köp mërë nï Ap-wony), in ibedo kwene?”

³⁹ Yecu ögamö nï, “Bin unu, ëka ibino nënö unu.”

Cë obino ginï ëka önënö ginï kanya ën onwongo bedo ië, caa onwongo dong cwök römö apar më kothyeno cë obedo ginï bothe i nïnö nön kibëc.

⁴⁰ Ngat acël i kin jö ariö n'onwongo owinyo Jon ka twak cë ölübö ginï Yecu onwongo obedo Anderiya, ömïn Cimon Petero.

⁴¹ Gin na Anderiya öcakö timö cücüth ënë më nwongo ömïn mërë Cimon ëka okobo nïnë nï, “Wan etyeko nwongo Meciya” (na tyën köp mërë ënë Kiricito).

⁴² Cë ën okelo Cimon both Yecu.

Yecu önönö Cimon ëka okobo nî, “In ibedo Cimon wod ka Jon. In ebino cwodoni nî Kepa” (na ka ëgönyö tyën köp mërë, gönyö nî Petero).

Yecu ocwodo Pilipo ëka Nathanael

⁴³ Kodiko mërë Yecu öthamö më cïdhö yo Galilaya. Ën örwatërë kî Pilipo cë okobo nînë nî, “Lüb köra.”

⁴⁴ Pilipo onwongo obedo dhanö më Bethsaida, taun na Anderiya ëka Petero onwongo bedo gîñi ië.

⁴⁵ Pilipo onwongo Nathanael ëka okobo nînë nî, “Wan enwongo ngat na Muca öcöö köp i kome i Cîk, ëka i kom ngat n'edwarpîny thon öcöö köp i kome—Yecu më Najaret, wod ka Yocepu.”

⁴⁶ Nathanael openyo nî, “Gin mörö na bër twërö donyo kî i Najaret?”

Pilipo okobo nî, “Bin ïnën.”

⁴⁷ Ì karë na Yecu önönö Nathanael ka tye ka bino yo bothe, ën ötwak i kome nî, “Nën unu dhanö më Icarael kikome, na gin mörö më twodo ope bothe.”

⁴⁸ Nathanael openyo Yecu nî, “In ingea nîngö?”

Yecu ögamö nî, “An aneni na in pod ibedo i tyën yath ölam na bara Pilipo ocwodi.”

⁴⁹ Cë Nathanael ögamö nî, “Apwony, in ibedo Wod k'Obanga; in ibedo rwoth më Icarael.”

⁵⁰ Yecu okobo nî, “In iye pïen an akobo nini nî an aneni ibedo i tyën yath ölam. In ibino nënö jami na döngö na löö manön.”

⁵¹ Yecu ömëdërë më kobo nî, “An akobo niwu köp adyer, un ibino nënö polo ka yabërë, ëka emalaika k'Obanga idho pîny ëka idhö gîñi malö i kom Wod ka Dhanö.”

2

Yecu ölökö pii ödökö köngö ölök

¹ Kinge nīnō arīō, karama mē nyom obedo i Kana i Galilaya. Aya ka Yecu onwongo tye kunōn,

² ēka Yecu k'elūbkörē thon onwongo ecwodogī i karama mē nyom nōn.

³ I karē na köngö ölök othum ökö, aya ka Yecu okobo both Yecu nī, “Köngö ölök mörö dong ope.”

⁴ Yecu ögamō n'aya mērē nī, “Aya, pīngö ikobo nīna köp nī? Caana bara örömō.”

⁵ Aya mērē okobo both etic nī, “Tīm unu gin mörö kēkēn na ēn bino kobo niwu.”

⁶ Aguli mē pii abicēl n'ēyübō kī kidi onwongo tye kany nōn, n'ecibo pī kite mē lönyērē k'Eyuda, agulu pii acēlacēl onwongo thwōnē na römō ketho pii na twērō thuno lita mia acēl.

⁷ Yecu okobo both etic nī, “Öny unu pii i aguli.” Cē öönyö gīnī pong naka i dhögī.

⁸ Cē Yecu okobo nīgī nī, “Kobedini twöm unu pii mökö, ēka iter unu both adwong nyom.”

Cē gīn otero.

⁹ I karē n'adwong nyom öbilö pii n'elökö ödökö köngö ölök, nakun ba ongeo kanya öya kī iē (ëntö etic n'ötwömö pii onwongo ongeo.) Cē ocwodo anyom thenge

¹⁰ ēka okobo nī, “Gin na jö kibēc tīmō mē acēl ēnē mē mīō köngö ölök na mīt, ēka ka jīī ömadhō örömögī, cē ekelo köngö ölök na ba mīt; ëntö in igwökö köngö ölök na mīt naka i caa nī.”

¹¹ Man ënē anyuth mē tango mērē mē acēl na Yecu ötimö i Kana mē Galilaya ēka ën onyutho dheo mērē, cē elūbkörē oketho yeegī i kome.

Yecu öryëmö ëcadh wîl kî î öt k'Obanga

¹² Kinge karama më nyom, Yecu öcîdhö yo Kaperanaum k'aya mërë, utmego mërë ëka ëlûbkörë cë obedo gîni kunön pî nînö mörö na nönök.

¹³ Î karë na karama më Poth k'Eyuda onwongo dong cwök, cë Yecu öcîdhö yo Jerucalem.

¹⁴ Ên onwongo jö na tye ka cadhë dhok, rom, ëka amam gîni ëka jö nökenë n'obedo î dhö cathgî lökö cîling î dyekal öt k'Obanga.

¹⁵ Yecu okedo thöl calö del, cë öryëmö jö kibëc kî î dyekal öt k'Obanga kanya acël kî rom ëka dhok. Ölökö mëjagî atarö ëka ökëthö cîling na nyige ka jö na lökö cîling.

¹⁶ Yecu okobo both jö n'onwongo cadhë amam gîni nî, “Kwany unu jami ni ökö kî kany! Kür îlök unu öt k'Apapna obed cuk!”

¹⁷ Cë ëlûbkörë opo gîni î cöc n'ëcöö nî: “Marna pî odi bino nekona ökö.”

¹⁸ Cë Eyuda openyo Yecu nî, “Anyuth më Tango mënë na in îtwërö tîmö më nyutho nîwa më moko twëröni më tîmö jami ni kibëc?”

¹⁹ Yecu ögamö nîgî nî, “Këth unu öt k'Obanga ni ökö, ëka an abino gërö dökî î nînö adek.”

²⁰ Eyuda ögamö nî, “Öt k'Obanga ni otero mwaka pyer angwën wie abicël më gërö, ëka in ibino gërö î nînö adek këkën?”

²¹ Êntö öt k'Obanga n'onwongo Yecu tye ka twak ië onwongo obedo kome.

²² Kinge na dong ecerö ën kî î kin jö n'öthöö, ëlûbkörë opo î köp na ën onwongo okobo. Cë oye

gini i kom Cöc na Leng ëka köp na Yecu onwongo ötwakö.

²³ I karë na Yecu onwongo tye i Jerucalem i karama më Poth, jö na pol önönö gini anyuth më tango na ën onwongo tye ka timö ëka oye gini i kome.

²⁴ Entö Yecu ba obedo ki gen i komgi, piën ën onwongo ngeo jö kibëc.

²⁵ Ngat mörö onwongo ba mitërë më kobo ninë kite na dhanö tye ködë, piën ën kikome ngeo gin na tye i cwiny dhanö.

3

Yecu gin ki Nikodemo

¹ Dhanö mörö onwongo tye n'obedo Aparicayo na nyingë Nikodemo. Ën onwongo obedo ngat acël i kin edong më öd okiko k'Eyuda.

² Ën öcïdhö both Yecu i kiwor cë okobo ninë ni, "Apwony, wan engeo ni in ibedo apwony n'Obanga ooro. Piën ngat mörö ope na twërö tio anyuth më tango na in itimö ka Obanga onwongo ba tye ködë."

³ Yecu ögamö ninë ni, "An akobo nini köp adyer ni ngat mörö ope na bino nönö ker k'Obanga ka ba ënywölö ën dökï."

⁴ Nikodemo openyo Yecu ni, "Ëtwërö nywölö dhanö ningö dökï ka dong oti ökö? Adyer ën ba twërö dönyö ii aya mërë ëk ënywöl dökï!"

⁵ Yecu ögamö ninë ni, "An akobo nini köp adyer ni ngat mörö ope na bino dönyö i ker k'Obanga ka ba ënywölö ki pii ëka ki Tipo Naleng."

⁶ Dhanö n'ënywölö kī kom tye kī kwö mē kom, ëntö dhanö n'ënywölö kī Tipo Naleng tye kī kwö mē cwiny.

⁷ In myero kür ibed kī ur ī kom ngö na an akobo, 'Un myero ënywölwu dökī.'

⁸ Yamö kudho yo kanya ën mütö. Iwinyo ngür mërë, ëntö ba irömö ngeo kanya ën öya kī ië onyo kanya ën tye ka cīdhö yo ië. Dhanö acēlacēl n'ënywölö kī Tipo Naleng tye nī kōmanön."

⁹ Nikodemo openyo Yecu nī, "Man twërö tīmërë nīngö?"

¹⁰ Yecu ögamö nī, "In ibedo apwony mē Icarael, ëka in ba itye ka nīang ī köp nī kībēc?

¹¹ An akobo niwu köp adyer, wan ëtwak ī kom gin na wan engeo, ëka wan ëmïö caden ī kom gin na wan ënënö, ëntö un bara iyeo köp na wan ekobo.

¹² Ka an akobo niwu köp ī kom jami mē lobo ëka ba iye unu; cē un itwërö yee nīngö ka an akobo niwu köp ī kom jami mē polo?

¹³ Ngat mörö ope na naka yam öcīdhö ī polo na path kī ngat n'obino kī ī polo—na ënë Wod ka Dhanö.

¹⁴ Kite na calö Muca otingo thwol malö ī kor yath kī ī thim, cē Wod ka Dhanö thon myero eting malö,

¹⁵ ëk dhanö acēlacēl na yee ī kome onwong kwö na ba thum.

¹⁶ "Obanga ömarö jö mē lobo nī rwök, cē ömïö Wode acēl kēkēn, ëk dhanö acēlacēl na yee ī kome kür öthöö, ëntö onwong kwö na ba thum.

¹⁷ Adyer, Obanga ba ooro Wode mē ngölö köp nī jö mē lobo, ëntö nī jö mē lobo myero ölarë pīrë.

¹⁸ Dhanö na yee ī kome, ba ebino ngölö köp nīnë, ëntö dhanö na ba yee ëngölö köp nīnë dong ökö,

pïen ba oyee i nyïng Wod k'Obanga acël kékën.

¹⁹ Ngölö-köp tye nï köman: Tar obino i lobo, ëntö jïi ömarö cöl pïny nakaka tar pïen ticgï onwongo obedo gin na rac.

²⁰ Jö kibëc na tïmö gin na rac dag gïni tar, ëka ba bino gïni i tar pï lworö nï ticgï bino nen ökö kanyalër.

²¹ Ëntö jö na tïmö gin na tye atïr bino gïni i tar, ëk ticgï onen ökö kanyalër nï gin na gïn otio obedo gin n'Obanga mïtö.”

Caden ka Jon Abatica i kom Yecu

²² Kinge, Yecu k'ëlübkörë öcïdhö gïni i lobo Yudea, kanya ën obedo ië pï nïnö mörö k'ëlübkörë nakun batica jïi.

²³ Jon Abatica thon onwongo tye ka batica jïi i Ainon na cwök kï Calim, pïen pii onwongo dwong kunön, ëka jïi onwongo tye ka bino bothe ëk ebat-icagï.

²⁴ (Man ötïmërë na bara eketho Jon i buc.)

²⁵ Cë pyem öcakërë i kin ëlübkör Jon mökö ëka Ayuda mörö i kom kite më lönyërë.

²⁶ Gïn obino both Jon ëka okobo gïni bothe nï, “Apwony, dhanö ca n'onwongo tye kodi yo löka kulo Jordan—na in ikobo köp i kome—nën, ën tye ka batica jïi, ëka jö kibëc tye ka cïdhö yo bothe.”

²⁷ Jon ögamö nï, “Dhanö twërö nwongo gin n'ëmïö ën kékën kï i polo.

²⁸ Un kï komwu itwërö unu moko nï an akobo, ‘An ba abedo Meciya ëntö an eora anyim nïñë.’

²⁹ Ngat na cung i nget nyakö n'ënyömö ënë obedo anyom. Okone k'anyom, na cung i ngete ëka winye, bedo na ië opong kï yom cwiny rwök ka

owinyo dwön anyom. Pï manön, an apong kï yom cwiny rwök.

³⁰ Ën myero ömëdërë; an myero adök pïny.

Ngat na bino kï i polo

³¹ “Ngat na bino kï malö löö jami kibëc; ngat n'öya kï i lobo ën obedo dhanö më lobo, ëka twak na calö ngat n'öya kï i lobo. Ngat n'öya kï i polo löö jami kibëc.

³² Ën miö caden i kom gin na ën önënö ëka owinyo, ëntö ngat mörö ope na yeo caden mërë.

³³ Ngat n'oyeo köp mërë, omoko kanya leng nï Obanga ënë Obanga më adyer.

³⁴ Ngat n'Obanga ooro twakö köp k'Obanga, pïën Obanga miö Tipo Naleng n'opong na ba pimo apima.

³⁵ Apap marö Wod ëka oketho jami kibëc i cingë.

³⁶ Dhanö na yee i kom Wod tye kï kwö na ba thum, ëntö ngat na kwërö Wod ba bino nwongo kwö, pïën akëmö k'Obanga bedo i kome.”

4

Yecu kï dhakö më Camaria

¹ Eparicayo owinyo gïni nï Yecu onwongo tye ka lökö jö na pol më bedo ëlëbkörë ëka baticagi na löö Jon,

² adyer Yecu kikome ba obatica ngat mörö, ëntö ëlëbkörë ënë obatica jïi.

³ I karë na Yecu ongeö köp ni, ën öya ökö kï i lobo Yudea ëka ödök cen i lobo më Galilaya.

⁴ Ën myero owok i lobo më Camaria.

⁵ Cē ěn obino ĩ taun mōrō mē Camaria na nyīngē Cukar, na cwōk kī ngōm na yam Jakob onwongo ōmīō wode Yocepu.

⁶ Kulo ka Jakob onwongo tye kunōn, kite na Yecu onwongo owotho odhero kōdē, ěn obedo ĩ nget kulo. Caa onwongo dong cwōk rōmō abicēl mē kiceng.

⁷ ĩ karē na dhakō mē Camaria obino mē twōmō pii, Yecu okobo nīnē nī, “Mīa pii mōrō amodhi.”

⁸ (Ēlūbkōrē onwongo ōcīdhō gīnī ĩ taun mē wīlō cem.)

⁹ Dhakō mē Camaria okobo nīnē nī, “In ibedo Ayuda ēka an abedo dhakō mē Camaria. Pīngō in ĩkwaō pii kī botha mē amodha?” (Pīēn Eyuda ba rībērē gīnī kī jō Camaria.)

¹⁰ Yecu ōgamō nīnē nī, “Ka onwongo ingeo mīc n'Obanga mīō ēka ngat na tye ka kwaōnī pii mē amodha, kono in ĩkwaō ěn cē ěn onwongo twērō mīōnī pii na mīō kwō.”

¹¹ Dhakō ōgamō nī, “Adwong, in ipe kī gin mōrō mē twōmō pii ēka kulo thon thuth. In ĩtwērō nwongo pii na mīō kwō nī kī kwene?

¹² In idit ĩlōō kwarōwa Jakob n'ōmīōwa kulo nī? Ēn kikome omodho pii nī kanya acēl k'ēthīnō mērē ēka kī leeni mērē.”

¹³ Yecu ōgamō nī, “Jō kībēc na bino modho pii nī ōrīō bino neko gī dōkī,

¹⁴ ěntō ngat mōrō na bino modho pii na an abino mīō ōrīō ba bino neko dōkī. Adyer, pii na an amīō bothe bino bedo wang pii na yenyo ĩ ĩē naka ĩ kwō na ba thum.”

¹⁵ Dhakö okobo nīnē nī, “Adwong, mīa pii ni ēk öriö kür oneka ēka kür amēdara mē bino kany mē twömö pii.”

¹⁶ Yecu okobo nīnē nī, “Apē ĭcīdh icwod cworī ēka idwogi cen kany.”

¹⁷ Dhakö ögamö nī, “An ape k'ēcwö.”

Cē Yecu okobo nīnē nī, “In ikobo atīr nī cworī ope.

¹⁸ Köp atīr ēnē nī, in onwongo itye kī cwö abic, ēka ěcwö na in itye ködē kobedini ba obedo cworī. Gin na in ikobo nīna tye atīr.”

¹⁹ Dhakö okobo nī, “Adwong, an anēnō nī in ibedo adwarpīny.

²⁰ Kwerewa wörö Obanga ĭ wi kidi nī, ěntö un Eyuda ikobo unu nī kabedo na jīī myero öwör Obanga ĩē tye ĭ Jerucalem.”

²¹ Cē Yecu okobo both dhakö nī, “Yee ĭ koma, dhakö, karē tye ka bino na jīī ba bino wörö Obanga Apap ĭ wi kidi nī onyo ĭ Jerucalem.

²² Un jö Camaria ĩwörö unu gin na ba ingeo unu; wan ěwörö gin na wan engeo, pīēn larē obino kī both Eyuda.

²³ ěntö karē tye ka bino ēka othuno dong ökö na jö na wörö Obanga bino wörö Apap ĭ cwiny ēka ĭ adyer, pīēn gīn obedo koth jö n'Apap rangö.

²⁴ Obanga obedo tipo, ēka jö na wörö ěn myero öwör gīnī ěn ĭ cwiny ēka adyer.”

²⁵ Dhakö okobo nī, “Adwong, an angeo nī Meciya” (n'ecwodo nī Kiricito) “tye ka bino. Ka obino, ěn bino kobo jami kībēc bothwa.”

²⁶ Cē Yecu okobo both dhakö nī, “An ěnön na tye ka twak kodi.”

Ēlūbkör Yecu odwogo bothe

27 Ī caa nōn cūcūth ēlūbkör Yecu odwogo ēka obedo gīnī kī ur mē nwongo Yecu tye ka twak kī dhakō. Ēntō ngat mörō ba openyo nī, “Ngō na in ĩmītō?” onyo “Pīngō itye ka twak kōdē?”

28 Cē dhakō öwēkō agulu pii mērē, ēka ödök cen ĩ taun cē okobo both jīi nī,

29 “Bin, ĩnēn unu ēcwō n'okobo nīna jami kībēc na yam an atīmō. Dhanō nī twērō bedo Meciya?”

30 Jīi öya kī ĩ taun ēka öcīdhō gīnī both Yecu.

31 Ī caa nōn, ēlūbkörē öbakō dhögī bothe nakun kobo gīnī nī, “Apwony, cam gin mörō.”

32 Ēntō ěn okobo bothgī nī, “An atye kī cem mē acama na un ba ingeo gin mörō ĩē.”

33 Cē ēlūbkörē ötwak ĩ kin-gī kēn-gī nī, “Ngat mörō ba okelo nīnē cem?”

34 Yecu okobo nī, “Cemna obedo mē tio gin na ngat n'oorā mītō ēka mē cobo tic mērē.

35 Un ba ikobo nī, ‘Odong dwethe angwēn ēka dong ēkaō kac’? An akobo niwu nī yab unu wangwu ēka ĩnēn unu pwothi! Cem dong öcēk ökö ēka örömō dong kac.

36 Ngat na kaō nwongo öcara, ēka cökō kodhi mē kwō na ba thum, ěk ngat na cwō kodhi ēka ngat na kaō obed gīnī kī yom cwiny kanya acēl.

37 Pīēn carolok kobo adyer nī, ‘Ngat acēl cwō ēka ngat nökēnē kaō.’

38 An aorowu mē kaō gin na un ba itio pīrē. Jō nökēnē ěnē otio tic na tēk rwök, ēka un ĩkaō adwogi mē ticgī.”

39 Jö Camaria na pol kī ī taun nōn oye gīnī ī kom Yecu pī kōp na dhakō okobo nī, “Ēn okobo nīna jami kībēc na an abedo tīmō.”

40 Ī karē na jö Camaria obino bothe, gīn ökwaö Yecu mē bedo bothgī ēka ěn obedo nīnō arīö.

41 Jö na pol oye gīnī ī kom Yecu pī kōp mērē na gīn owinyo.

42 Gīn okobo both dhakō nī, “Wan dong ba eye pī kōp na in ikobo nīwa kēkēn; ěntō wan ewinyo kī ithwa, ēka wan engeo adyer nī dhanō ni obedo Alar mē lobo.”

Yecu öcangö athīn k'Adit

43 Kinge nīnō arīö ěn öya öcīdhö yo Galilaya.

44 (Yecu kikome onwongo okobo cōn nī ad-warpīny ba ěwörö kī ī lobo mērē.)

45 Ī karē na Yecu othuno ī Galilaya, jö mē Galilaya öjölö ěn. Gīn onwongo önēnō jami kībēc na ěn obedo tīmō ī Jerucalem ī karama mē Poth, pīēn gīn thon onwongo tye kunōn.

46 Cē ěn dōkī odwogo yo Kana ī Galilaya, kanya ěn onwongo ölökö pii ödökö köngö ölökö. Adit mörö onwongo tye ī Kaperanaum na wode two.

47 Ī karē na ěn owinyo nī Yecu öya ökö kī ī Yudea, obino ī Galilaya, ěn öcīdhö yo both Yecu ēka ökwaö ěn mē cīdhö cangö wode, n'onwongo dong cwök thöö.

48 Yecu okobo nīnē nī, “Ka un ba īnēnō anyuth mē tango ēka gīn mē aura, un ba ibino yee.”

49 Adit okobo nīnē nī, “Adwong, bin n'athīn-na bara öthöö.”

50 Yecu ögamö nī, “In ětwērö cīdhö. Wodi bino kwö.”

Adit oye i köp ka Yecu cê ödök yo pacö.

⁵¹ Na ën onwongo pod tye i wanga yoo, atic mërë oromo ködë k'emuth ni wode tye na kwö.

⁵² Ën openyogî caa na kom athîn öcakö bedo na bër. Gîn okobo ni, “Two lyetho öya ki i kome woro caa abirö.”

⁵³ Cê apap k'athîn öniang ni man ënë caa na Yecu onwongo okobo ni, “Wodi bino kwö.” Cê ën ki jö më ödë kibëc oye gîni i kom Yecu.

⁵⁴ Man anyuth më tango më ariö na Yecu ötimö, i karë na ën öya ki Yudea ëka obino i Galilaya.

5

Yecu öcangö angwalo i dhö kulo

¹ Kinge karë mörö, Yecu öcïdhö yo Jerucalem i karama k'Eyuda.

² I Jerucalem, i nget Dhö Wangkac më Rom, onwongo tye kulo n'ecwodo ni Beteceda i lëb Iburu n'onwongo tye ië bölö abic.

³ Jö na two na pol—ëthöö wang, engwalo ëka jö na komgi okwe—onwongo buto gîni ië. [Gîn onwongo kürö ka erubo pii,

⁴ piën karë mökö malaika ka Rwoth onwongo bino më rubo pii ki i kulo. Ngat n'öcakö dönyö i pii nakun pod erubo aruba, cang ökö ki kom two kibëc n'onwongo tye i kome.]*

⁵ Ëcwö mörö onwongo tye kunön na two oruu i kome pi mwaka pyer adek wie aboro.

* **5:4 5:4** Köp ni nwongere i buke na cön na pîrgi ba tæk.

⁶ Ì karë na Yecu önënö ën obuto kunön ëka öniang nĩ ën otwore pĩ karë na lac, Yecu openyo ëcwö nĩ, “In ìmitö nĩ ìcang?”

⁷ Ëcwö na two ögamö nĩ, “Adwong, an ape kĩ ngat mörö na lutha ì kulo ka pii orubere. Ka an atëmö më dönyö ì pii, ngat nökënë cakö yaa pye ökö ì nyima.”

⁸ Cë Yecu okobo nĩnë nĩ, “Yaa malö! Kwany ökëkani ëka ìcak woth.”

⁹ Cücüth ëcwö nĩ öcang ökö, ëka ökwanyö ökëka mërë cë öcakö woth.

Ninö na gin nĩ ötimërë ië onwongo obedo ceng Cabit k'Eyuda,

¹⁰ ëka ëtëla k'Eyuda okobo both ëcwö n'onwongo ëcangö nĩ, “Tin ceng Cabit; cik ba yeo nĩ in iting ökëkani.”

¹¹ Ëntö ën ögamö nĩ, “Ngat n'öcanga okobo nĩna nĩ, ‘Kwany ökëkani ëka ìcak woth.’ ”

¹² Gĩn openyo ën nĩ, “Nga ënön n'okobo nini nĩ, ‘Kwany ökëkani ëka ìcak woth?’ ”

¹³ Ëntö ëcwö n'onwongo ëcangö ba ongeö nga ënön, piën Yecu onwongo ödönyö ökö ì kin jö na pol n'onwongo tye ì kabedo nön.

¹⁴ Kinge Yecu onwongo ëcwö nĩ ì öt k'Obanga ëka okobo nĩnë nĩ, “Nën, in ìcang dong ökö. Kür dökĩ itim bal, ëk gin na rac na löö manön kür opodh ì komi.”

¹⁵ Cë ëcwö nön öcīdhö ëka okobo both ëtëla k'Eyuda nĩ Yecu ënë öcangë.

Twër na Wod k'Obanga tye ködë

¹⁶ Ëtëla k'Eyuda öcakö gĩnĩ yelo Yecu piën ën öcangö dhanö ì ceng Cabit.

¹⁷ Yecu okobo nīgī nī, “Apapna tye ka tic ī karē kībēc naka tin, ēka an thon atye ka tic.”

¹⁸ Pī tyēn köp nī ētēla k'Eyuda ötēmō gīnī yodhi kībēc mē neko Yecu; ēn ba ötürō cīk mē ceng Cabīt kēkēn, ēntō ēn onwongo thon kobo nī Obanga obedo Apap mērē, na mīō ēn bedo na rōm k'Obanga.

¹⁹ Cē Yecu ögamō köpgī nī, “An akobo niwu köp adyer, Wod ba twērō tīmō gīn mörō pīrē kēnē; ēn twērō tīmō gīn na ēn nēnō n'Apap mērē tīmō, pīēn gīn mörō kēkēn n'Apap tīmō Wod thon tīmō.

²⁰ Apap marō Wod ēka nyutho nīnē jami kībēc na ēn tīmō. Ēn bino nyutho nīnē thon jami na dōngō mē atīma na lōō man ēka un kībēc ibino uro.

²¹ Kite na calō Apap cero jō n'ōthōō ēka mīōgī kwō, ī yoo acēl nōn Wod thon mīō kwō both ngat mörō kēkēn na ēn mītō.

²² Apap thon ba ngölō köp ī kom ngat mörō ēntō ömīō ngölō-köp kībēc both Wod,

²³ ēk jō kībēc öwör Wod kite na calō gīn wörō k'Apap ködē. Ngat na ba wörō Wod nwongo ba wörō Apap n'ooro ēn.

²⁴ “An akobo niwu köp adyer, ngat mörō kēkēn na winyo köpna ēka yee ī kom ngat n'oora tye kī kwō na ba thum ēka ba ebino ngölō köp nīnē; ēn öya ökö kī ī thōō othuno ī kwō.

²⁵ An akobo niwu köp adyer nī karē tye ka bino ēka othuno ökö na jō n'ōthōō bino winyo dwōn Wod k'Obanga ēka jō na bino winyo bino kwō gīnī.

²⁶ Kite na calō kwō yaa kī both Apap, kōmanōn thon ēn oye nī kwō myero öya kī both Wod,

²⁷ ēka ömīō ēn twēr mē ngölō köp pīēn ēn obedo Wod ka Dhanō.

28 “Kür ibed unu kī ur ī köp nī, piēn karē tye ka bino na jō kibēc na tye ī lyenegī bino winyo gīnī dwönē

29 ěka donyo gīnī yökō—jō n'ötīmō gin na bër bino cer gīnī ī kwō na ba thum, ěka jō n'ötīmō gin na rac bino cer gīnī ěk ěngöl köp nīgī.

30 An ba atwërō tīmō gin mörō pīra kēna; an angölō köp kite na calō an awinyo kōdē, ěka ngölō-köpna tye atīr, piēn an ba amītō tīmō gin na an amītō ěntō gin na ngat n'oora mītō.

Caden ī kom Yecu

31 “Ka an akobo köp mē caden ī koma kēna, caden-na ba bedo köp atīr.

32 Ngat nökēnē tye na kobo köp mē caden ī koma, ěka an angeo nī caden na ěn kobo ī koma obedo köp adyer.

33 “Un ioro jīī both Jon Abatica ěka ěn okobo köp mē caden adyer.

34 Pathī nī an ayeo caden ka dhanō; ěntō an akobo köp nī ěk īlarē unu.

35 Jon onwongo obedo calō tara n'ěcwīnyō na lyēl ěka un iyērō mē bedo kī yom cwiny pī karē na nōnōk ī tar mērē.

36 “An atye kī köp mē caden na pīrē dit na lōō mē ka Jon ökō. Tic n'Apapna ōmīō botha mē tyeko, ěka na an atye ka tīmō, mīō caden nī Apap oora.

37 Apap n'oora thon, ěn kikome okobo köp mē caden ī koma. Un anaka bara iwinyo unu dwönē onyo nēnō kite na ěn obedo kōdē,

38 ěka köp mērē ope ī īwu, piēn ba iye unu ngat na ěn ooro.

39 Un irangö Cöc na Leng piën ithamö unu nĩ miöwu kwö na ba thum. Man ënë Cöc na Leng na twakö köp më caden i koma,

40 ëntö ikwërö unu bino botha ëk inwong unu kwö.

41 “An ba arangö pak kĩ both dhanö,

42 ëntö an angeowu. An angeo nĩ un ipe kĩ mar k'Obanga i cwinywu.

43 An abino kĩ nyĩng Apapna, ëka un ba iyea; ëntö ka ngat mörö na path obino kĩ nyĩngë, un ibino yeo ën.

44 Un itwërö yee nĩngö ka ngat acëlacël rangö pak kĩ both awodhe, ëntö ba irangö unu pak na yaa kĩ both Obanga acël këkën?

45 “Kür itham unu nĩ an abino dothowu both Obanga Apap. Ngat na bino dothowu ënë Muca na un iketho genwu i kome.

46 Ka onwongo iyeo unu Muca, onwongo myero iyea unu, piën Muca öcöö köp i koma.

47 Ëntö kite na un ba iyeo köp na ën öcöö, un itwërö yee gin na an akobo nĩngö?”

6

Yecu öpidhö jö elip abic

(Matayo 14:13-21; Marako 6:30-44; Luka 9:10-17)

¹ Kinge karë mörö Yecu öcidhö yo löka Nam më Galilaya (n'ecwodo thon nĩ Nam më Tiberia),

² ëka lwak na pol ölübö ën piën gĩn önënö anyuth më tango n'onwongo ën ötimö më cangö etwoe.

³ Cë Yecu öidhö malö i wi kidi ëka obedo pĩny k'ëlübkörë.

⁴ Karë më karama më Poth k'Eyuda onwongo dong cwök.

⁵ Na Yecu önönö lwak tye ka bino yo bothe, ën okobo both Pilipo nĩ, “Kwene na onu ebino wĩlō cem kĩ ië më pĩdhō jō nĩ?”

⁶ Yecu okobo kōp nĩ më tēmō Pilipo, piën Yecu onwongo dong ngeo gin na ën ebino tĩmō.

⁷ Pilipo ögamō nĩnē nĩ, “Denario mia ariō ba bino rōmō më wĩlō ogati ëk ngat acēlacēl ögam na nōnōk!”

⁸ Ngat acēl n'obedo alübkörē n'ecwodo nĩ Anderiya, ömĩn Cimon Petero, okobo nĩnē nĩ,

⁹ “Awobi mörō tye kany n'ōmakō ogati abic më cayiri ëka rēc ariō na thĩthĩnō, ëntō kara man twērō kōnyō ngō both jō na pol nĩ kōman?”

¹⁰ Yecu okobo nĩ, “Mĩi unu jĩi obed pĩny.” Lum onwongo ölöth rwök i kabedo nōn, ëka jĩi obedo pĩny, kĩ kin jō n'obedo pĩny, wel cwō kēkēn onwongo mītō rōmō elip abic.

¹¹ Cē Yecu ökwanyō ogati abic, öpwōyō Obanga, ëka ömĩō both ëlübkörē cē gĩn opoko both jō n'onwongo obedo pĩny. Ën ötīmō nĩ kōmanōn thon i kom rēc ëka jō kibēc öcamō kite na gĩn ömītō kōdē.

¹² I karë na gĩn kibēc ocemo oyeng, Yecu okobo both ëlübkörē nĩ, “Cök unu ngĩnyē n'odong ëk gin mörō kür öbal.”

¹³ Cē ëlübkörē öcökō ngĩny ogati më cayiri na jĩi öcamō ewēkō ökö ëka epikō pong aditi apar wie ariō.

¹⁴ Kinge na jĩi önönö anyuth më tango na Yecu otio, gĩn öcakō kobo nĩ, “Adyer man ënē Adwarpĩny na myero obin i lobo.”

15 Ī karē na Yecu ōñiang nī gīn onwongo mītō bino mē diōnē bedo rwoth, cē ēn ōlūū ōkō kēnē yo wi kidi.

Yecu owotho ī wi pii

(Matayo 14:22-33; Marako 6:45-52)

16 Ī karē na pīny ocido, ēlūbkōrē ōcīdhō gīnī ī dhō nam,

17 cē ōdōnyō gīnī ī ōd yeya ēka ōngölō ī nam mē cīdhō yo Kaperanaum. Ī caa nōn pīny onwongo dong cōl, ēka Yecu onwongo bara obino bothgī.

18 Yamō na tēk onwongo tye ka kudho ēka onwongo tye ka rubo pii.

19 Ī karē na gīn ōkwang na rōmō kilomita abic onyo abicēl, gīn ōnēnō Yecu ka tye ka bino yo bothgī na wotho ī wi pii, cē lworō ōmakōgī rwōk.

20 Ēntō Yecu okobo nīgī nī, “An ēnōn; kūr ibed unu kī lworō.”

21 Ēlūbkōr Yecu ōmīō ēn ōdōnyō ī yeya bothgī. Cūcūth yeya othuno ī lak nam kanya onwongo gīn tye ka cīdhō yo iē.

22 Kodiko mērē lwak n'onwongo odong gīnī yo lōka nam ōñiang nī yeya acēl kēkēn ēnē onwongo tye kunōn, ēka Yecu onwongo ba ōdōnyō iē k'ēlūbkōrē, ēntō gīn kara onwongo ōcīdhō kēn-gī.

23 Cē yeya mōkō n'ōya gīnī kī ī Tiberia obino ēka ocung gīnī na cwōk ī kabedo na jīi onwongo ōcamō ogati iē kinge na Rwoth ōpwōyō Obanga.

24 Ī karē na lwak ōnēnō nī Yecu onyo ēlūbkōrē onwongo ope gīnī kunōn, gīn ōdōnyō ī yeya ēka ōcīdhō gīnī yo Kaperanaum mē rangō Yecu.

Yecu ēnē Ogati mē Kwō

25 Ī karë na gïn onwongo Yecu ĩ löka nam tung ca, gïn openyo ën nĩ, “Apwony, in ithuno kany awene?”

26 Yecu ögamö nĩ, “Adyer an akobo niwu, un itye ka rangöna piën an apidhöwu kĩ cem ëka iyeng unu, pathĩ nĩ piën un inënö anyuth më tango.

27 Kür itii unu pĩ cem na töp ökö, ëntö tii unu pĩ cem na bedo naka ĩ kwö na ba thum, na Wod ka Dhanö bino miöwu. Obanga Apap omoko nakun ketho anyuth mërë ĩ kome.”

28 Cë gïn openyo Yecu nĩ, “Ngö na wan myero ëtīm ëk ëtīm gïn n'Obanga mītö?”

29 Yecu ögamö nĩ, “Tic k'Obanga ene: më yee ĩ kom ngat na ën ooro.”

30 Gïn openyo Yecu dökĩ nĩ, “Anyuth më tango mënë na in ibino miö ëk wan ënën ëka eyee köp na in ikobo? Ngö na in ibino tīmō?

31 Kwerewa öcamö manna ĩ thim; kite n'ëcöö ködë: ‘Ën ömiögĩ ogati n'öya kĩ ĩ polo ëk öcam gĩnĩ.”

32 Yecu okobo nigĩ nĩ, “An akobo niwu köp adyer, pathĩ Muca ënë ömiöwu ogati n'öya kĩ ĩ polo, ëntö Apapna ënë miöwu ogati n'atir na yaa kĩ ĩ polo.

33 Ogati k'Obanga n'atir ënë ngat na bino kĩ ĩ polo yo piny ëka miö kwö both jö më lobo.”

34 Gïn okobo nĩ, “Adwong, cakërë kobedini miüwa ogati ni ĩ karë kibëc.”

35 Cë Yecu okobo bothgĩ nĩ, “An ënë ogati na miö kwö. Ngat na bino botha kec ba bino neko, ëka ngat na yee ĩ koma öriö ba bino neko.

36 Ëntö an akobo niwu nĩ inëna unu ökö ëka pod bara iyee unu.

³⁷ Jö kibëc n'Apapna miö botha bino bino gini botha, ëka ngat n'obino botha an ba abino ryëmö ökö.

³⁸ Piën an abino piny ki i polo pathi më cobo mitina këna ëntö më cobo miti ka ngat n'oora.

³⁹ Man ënë miti ka ngat n'oora, ni kür arweny ngat mörö acël ki kin jö kibëc na ën ömïa, ëntö acergi i ninö më ajiki.

⁴⁰ Man ënë gin n'Apapna mitö, ni dhanö acëlacël na nënö Wod ëka yee i kome, myero onwong kwö na ba thum cë an abino cero ën i ninö më ajiki.”

⁴¹ Cë i caa nön Eyuda n'onwongo pyem ki Yecu öcakö ngüngüta i kome piën ën okobo ni, “An ënë ogati n'obino piny ki i polo.”

⁴² Gin okobo ni, “Man pathi Yecu, wod ka Yocepu, n'apap mërë ëka aya mërë wan engeo? Pïngö ën kobo ni, ‘An abino piny ki i polo?’”

⁴³ Yecu ögamö ni, “Kür ingüngüta unu i kinwu kenwu.”

⁴⁴ Ngat mörö ope na twërö bino botha thwara k'Apap n'oora ömïö ën më bino botha, ëka an abino cero ën i ninö më ajiki.

⁴⁵ Ecöö i buke k'edwarpiny ni: “Obanga bino pwonyogi kibëc. Ngat acëlacël na winyo köp ki both Apap ëka pwonyere ki bothe bino yo botha.

⁴⁶ Ngat mörö ope n'önënö Apap na path ki ngat n'öya ki both Obanga; ën këkën ënë önënö Apap.

⁴⁷ An akobo niwu köp adyer, ngat na yee tye ki kwö na bedo naka naka.

⁴⁸ An abedo ogati na miö kwö.

⁴⁹ Kwerewu öcamö manna i thim, ëka öthöö gini kibëc.

⁵⁰ Ëntö ngat mörö na bino camö ogati n'obino kī i polo ba bino thöö.

⁵¹ An abedo ogati na miö kwö n'obino piny kī i polo. Ka ngat mörö öcamö ogati ni, ën bino kwö na twal. Ogati ni ënë koma, na an abino miö ëk jö më lobo obed kī kwö më cwiny.”

⁵² Cë Eyuda n'onwongo pyem kī Yecu öcakö gini pyem na gwaü i kin-gi, “Dhanö ni twerö miöwa kome më acama ningö?”

⁵³ Yecu okobo nigi ni, “An akobo niwu köp adyer, thwara ka icamö unu kom Wod ka Dhanö ëka imadhö unu remo mërë, ba ibino bedo unu kī kwö i komwu.

⁵⁴ Ngat n'öcamö koma ëka ömadhö remona bedo kī kwö na ba thum, ëka an abino cero ën i ninö më ajiki.

⁵⁵ Piën koma obedo cem më adyer, ëka remona obedo gin më amadha më adyer.

⁵⁶ Ngat na camö koma ëka madhö remona bedo i an ëka an abedo i ën.

⁵⁷ Kite n'Apap na kwö oora ëka an akwö pi Apap, kömanön thon ngat na camö koma bino kwö pi an.

⁵⁸ Kwerewu öcamö manna ëka öthöö gini, ëntö ngat na camö ogati n'obino piny kī i polo bino kwö na twal.”

⁵⁹ Yecu okobo köp ni nakun tye ka pwony i cinagoga i Kaperanaum.

Köp më kwö na ba thum

⁶⁰ I karë n'ëlübkör Yecu na pol owinyo köp mërë, gin okobo ni, “Man obedo pwony na tük. Nga na twerö yeo köp ni?”

⁶¹ I karë na Yecu ongeö nî ëlëbkörë onwongo tye ka ngüngüta i köp nî, ën okobo nîgî nî, “Köp nî öbalö thamawu ökö?”

⁶² Cë ngö na un ibino thamö ka inënö unu Wod ka Dhanö tye ka cïdhö yo polo kanya ën onwongo tye ië cön?

⁶³ Gin na mïö kwö ënë Tipo Naleng; kom ba könyö gin mörö. Köp na an atwakö bothwu obedo köp më cwiný ëka kwö.

⁶⁴ Ëntö jö mökö pod tye i kinwu na ba yee i koma.” Piën cakërë i acaki, Yecu onwongo ongeö jö na ba bino yee ëka kî ngat na bino ketho örörö i kome.

⁶⁵ Ën ömëdërë më kobo nî, “Man ënë ömïö an akobo niwu nî ngat mörö ope na twërö bino botha thwara k'Apap ömïö ën më bino botha.”

⁶⁶ Cakërë i karë nön ëlëbkörë na pol öwëkö gîñi lübö körë ëka ba dökî ömëdërë gîñi më lübö ën.

⁶⁷ Yecu openyo ëlëbkörë apar wie ariö nî, “Un thon imitö cïdhö ökö?”

⁶⁸ Cimon Petero ögamö nî, “Rwoth, wan ebino cïdhö yo both nga? In itye kî köp më kwö na ba thum.

⁶⁹ Wan eye ëka engeo nî in ibedo Ngat Naleng k'Obanga.”

⁷⁰ Cë Yecu okobo nîgî nî, “An onwongo ba ayëröwu jö apar wie ariö? Ëntö dhanö acël i kinwu obedo atic ka Catan!”

⁷¹ (Ën onwongo tye ka twak i kom ngat na bino ketho örörö i kome, Yuda wod ka Cimon Ikariot, n'onwongo obedo dhanö acël i kin ëlëbkör Yecu apar wie ariö.)

7

Yecu ëka utmego mërë

¹ Kinge, Yecu obedo ka woth i Galilaya, ën onwongo ba mitö cïdhö yo Yudea piën ëtëla k'Eyuda onwongo mitö neko ën ökö.

² Karë më karama k'Eyuda n'ecwodo ni Karama më Bölö onwongo dong cwök,

³ cë utmego ka Yecu okobo nïnë ni, "In myero iya ki kany icïdh yo Yudea, ëk ëlëbkori önën tango na in itio.

⁴ Ngat mörö ope na mitö tio tic i müng, ka ën kikome mitö ni jii onge. Ka in itio tic ni gini, nyuthiri keni both lobo."

⁵ (Naka thon utmego mërë ba oye gini i kome.)

⁶ Yecu okobo nigï ni, "Karëna bara örömö; ëntö karëwu tye ninö kibëc.

⁷ Jö më lobo ba twërö dagöwu, ëntö daga gini piën an akobo köp më caden i komgi ni ticgi obedo gin na rac.

⁸ Cïdh unu i karama. An bara acïdhö i karama ni, piën karëna bara örömö."

⁹ I karë na Yecu okobo köp ni, ën odong i Galilaya.

¹⁰ Kinge na dong utmego mërë öcïdhö gini i karama, Yecu thon öcïdhö i müng na ba ënënö.

¹¹ Etëla k'Eyuda obedo ka rangö Yecu i karama nakun penyo gini ni, "Ën tye kwene?"

¹² Lwak onwongo tye ka ngüngüta i kome. Jö mökö onwongo tye ka kobo ni, "Ën obedo dhanö na bër."

Jö nökenë okobo ni, "Pe, ën tye ka bwölö jö abwöla."

13 Ëntö ngat mörö ope n'ötwakö köp i kome kanyalër piën gin onwongo lworö ëtëla k'Eyuda.

Yecu opwonyo i karama

14 I karë na karama othuno i dyere, Yecu öcïdhö i dyekal öt k'Obanga ëka öcakö pwony.

15 Ëtëla k'Eyuda obedo ki ur ëka okobo ginï nï, “Dhanö ni onwongo koth pwony ni ningö nakun ba ökwanö?”

16 Yecu ögamö nï, “Pwonyna ba obedo mëga, ëntö öya ki both ngat n'oorä.

17 Ka ngat mörö öyëro më tio gin n'Obanga mitö, ën bino ngeo ka pwonyna öya ki both Obanga onyo ka an atye ka twak pïra këna.

18 Ngat na twak pïrë kënë timö më nwongo wörö na pïrë kënë, ëntö ngat na rangö wörö pï ngat n'oores, ën obedo dhanö më adyer; gin mörö më twodo ope i kome.

19 Muca yam ba ömïöwu cïk? Ëntö dhanö mörö ope i kinwu na gwökö cïk. Pïngö un imitö nekona unu?”

20 Lwak ögamö nï, “In ibedo ngat na cen ömakö. Nga na mitö nekoni?”

21 Yecu okobo bothgi nï, “An atio tango acël, ëka un kibëc iuro.

22 Muca ömïöwu cïk më lirë ëka un ilirö athïn awobi i ceng Cabit k'Eyuda. (Adyer kite më thëkwarö më lirë ni öcakërë ki both kwerewu, na bara Muca ömïö cïk.)

23 Kobedini ka ëtwërö lirö athïn i ceng Cabit ëk cïk ka Muca kür myero ëtür, pïngö un ikëcö i koma pï cangö kom dhanö kibëc i ceng Cabit?

24 Kür ingöl köp na lübërë ki gin na un inënö, ëntö ngöl unu köp n'atir.”

Yecu ënë Meciya?

²⁵ Cë jö mökö më Jerucalem öcakö penyo ni, “Pathi dhanö ni ënë gin mitö neko?

²⁶ Nën, ën tye ka twak kanyalër, ëka ba tye ka kobo gini köp mörö bothe. Ëlöc omoko dong adyer ni ën obedo Meciya?

²⁷ Ëntö wan engeo kanya dhanö ni öya ki ië; ka Meciya bino bino, ngat mörö ope na bino ngeo kanya ën yaa ki ië.”

²⁸ Cë na Yecu pod tye ka pwony i dyekal öt k'Obanga, ën oredo rwök ni, “Adyer un ingea, ëka ingeo unu kanya an aya ki ië. An ba atye kany pira këna. Ëntö ngat n'oorä tye adyer ëka un ba ingeo ën.

²⁹ An angeo ën piën an aya ki bothe ëka ën oora.”

³⁰ Cë gin ötëmö makö Yecu, ëntö ngat mörö ope n'oketho cingë i kome, piën caa mërë onwongo bara örömö.

³¹ Jö na pol ki kin lwak oketho yeegi i kome ëka okobo gini ni, “I karë na Meciya bino bino, ën bino tio anyuth më tango na pol na löö dhanö ni?”

³² Eparicayo owinyo ka lwak tye ka mwöng gini i kom Yecu, cë ëlamdhök na dito ëka Eparicayo ooro acikari më öt k'Obanga më makö Yecu.

³³ Yecu okobo ni, “An atye kodwu pi karë mörö na nönök, cë an abino cidhö yo both ngat n'oorä.

³⁴ Un ibino rangöna, ëntö ba ibino unu nwongona; ëka kanya an atye ië, un ba itwërö bino ië.”

³⁵ Ëtëla k'Eyuda ötwak i kin-gi kën-gi ni, “Kwene na dhanö ni mitö cidhö yo ië na wan ba ëtwërö

nwongo ën? Ën mütö cïdhö both jöwa n'ökëth ata i kin Erok* më pwonyogï?

³⁶ Tyën köp na ën okobo ni, 'Un ibino rangöna, ëntö ba ibino unu nwongona,' ëka 'Kanya an atye ië, un ba itwëro bino ië' gönyö nïngö?"

³⁷ I nïnö na dit më ajiki më karama, Yecu öya malö ëka oredo ki dwön na malö ni, "Ka öriö oneko ngat mörö, myero ën obin botha ëka omodhi.

³⁸ Ngat mörö këkën na yee i koma, kite na Cöc na Leng kobo, kulo më pii më kwö bino molo nakun yaa ki i cwinye."

³⁹ Yecu ötwak i kom Tipo Naleng, na jö n'oye i kome bino nwongo gïni. I karë nön Tipo Naleng onwongo bara ëmiö, piën Yecu onwongo bara eketho dheo i kome.

⁴⁰ I karë na gïn owinyo köp mërë, jö mökö okobo ni, "Adyer dhanö ni obedo Adwarpïny."

⁴¹ Jö nökenë okobo ni, "Ën obedo Meciya."

Ëntö jö nökenë pod okobo ni, "Meciya twëro yaa ki i Galilaya nïngö?

⁴² Cöc na Leng ba kobo ni Meciya bino yaa ki i dhogola ka Daudi ëka ki i Bethelëm, taun na Daudi obedo ië?"

⁴³ Cë jïi öcakö popoka gïni pi Yecu.

⁴⁴ Jö mökö ömitö makö ën, ëntö ngat mörö ba oketho cïngë i kome.

Ëtëla k'Eyuda ba oye i kom Yecu

⁴⁵ I karë n'acikari më öt k'Obanga odwogo, ëlamdhök na dito ëka Eparicayo openyogï ni, "Pïngö un ba ikelo ën?"

* **7:35 7:35 Erok**Man obedo jö Girik.

⁴⁶ Acikari më öt k'Obanga ögamö nî, “Ngat mörö anaka yam bara ötwak kite na dhanö ni twak ködë.”

⁴⁷ Eparicayo ögamö nî, “Un thon ëbwölöwu ökö?”

⁴⁸ Ngat mörö tye i kin onu ëlök onyo Eparicayo n'oye i kome?

⁴⁹ Ope! Ëntö lwak ni na ba ngeo gîni cîk—ëlamögi dong ökö.”

⁵⁰ Nikodemo, n'onwongo öcîdhö both Yecu cön ëka n'onwongo obedo ngat acël i kin-gî, openyogi nî.

⁵¹ “Cîk onu yeo më ngölö köp i kom dhanö na bara ewinyo köp na yaa kî i dhögë, më nîang i kom ngö na ën ötîmö?”

⁵² Gîn ögamö nî, “In thon iya kî i Galilaya? Rang na bër kî i Cöc na Leng ëka ibino nwongo nî adwarpîny mörö ope na yaa kî i Galilaya.”

⁵³ [Cë ngat acëlacël öcîdhö yo pacö mërë.

8

Dhakö n'ëmakö i Elomi

¹ Yecu öcîdhö i wi Kidi më Jeituni.

² Kodiko cön, ën dökî odwogo i dyekal öt k'Obanga, jö kibëc obino bothe, cë ën obedo pîny më pwonyogi.

³ Cë epwony Cîk ëka Eparicayo okelo gîni dhakö mörö n'ëmakö i elomi. Gîn ömïö ën ocung i nyimgî

⁴ ëka okobo gîni both Yecu nî, “Apwony, dhakö ni ëmakö i tîm më elomi.

⁵ Kî i Cîk, Muca öcîköwa nî myero ecel koth mon ni kî kite. In ikobo nîngö ië?”

⁶ Gîn openyo peny ni më tëmö Yecu, ëk enwong kî köp mörö më dotho ën.

Ëntö Yecu ogungo piny cë öcakö cöö ngöm ki nya cingë.

⁷ İ karë na gın mēdērē mē penyo Yecu, ěn öya malö cë okobo nīgī nī, “Ka ngat mörö tye i kinwu n'ope ki bal, myero ěn öcak celo dhakö ni ki kidi.”

⁸ Ěn dökī ogungo cë öcöö ngöm.

⁹ İ karë na gın owinyo köp nön, öcakö gīnī cīdhö k'acēlacēl cakērē ki both jö na dito naka Yecu odong kēnē ki dhakö na pod ocung kany nön.

¹⁰ Cë Yecu öya malö ěka openyo ěn nī, “Dhakö, tye gīnī kwene? Ngat mörö ba öngölö köp i komi?”

¹¹ Ěn ögamö nī, “Adwong, ngat mörö ope.”

Cë Yecu okobo nīnē nī, “An thon ba angölö köp i komi. Cīdhī ěka kür dökī itīm bal.”]*

Yecu ěnē Tar mē lobo

¹² İ karë na Yecu dökī ötwak ki jīl, ěn okobo nī, “An abedo tar mē lobo, ngat na lübö köra ba bino woth i cöl piny, ěntö bino bedo ki tar mē kwö.”

¹³ Eparicayo ögamö nī, “Kobedini in imiö köp mē caden i komi keni; caden-ni ba tye atir.”

¹⁴ Yecu ögamö nī, “Kadī bed an akob caden i koma kēna, caden-na ěnē köp na tye atir pīen an angeo kanya an aya ki iē ěka kanya an acīdhö yo iē. Ěntö un ba ingeo kanya an aya ki iē ěka kanya an acīdhö yo iē.

¹⁵ Un ingölö köp i kite ka dhanö, ěntö an ba angölö köp i kom ngat mörö.

¹⁶ Ěntö ka an angölö köp, ngölö-köpna tye atir, pīen an ba atye kēna i ngölö-köp ěntö Apap n'ora tye köda kanya acēl.

* **8:11 8:11** Cöc na cön ba öcöö gīnī Jon 7:53-8:11.

17 İ Cık na mewu ecöö nı köp me caden ka jö arıö bedo caden n'atır.

18 An amoko köp me caden i koma këna, ëka Apap n'oora ënë acaden-na nökenë.”

19 Cë gın openyo Yecu nı, “Apapni tye kwene?”

Ën ögamö nı, “Un ba ingea unu onyo Apapna. Ka onwongo ingea unu, onwongo ingeo unu Apapna thon.”

20 Ën okobo köp ni gını i karë na ën tye ka pwony i dyekal öt k'Obanga na cwök ki kanya ëkanö mıc ië. Ëntö ngat mörö ba ömakö ën, piën caa mërë onwongo bara örömö.

21 Cë Yecu dökı okobo nigı nı, “An acıdhö ökö, ëka un ibino rangöna, ëntö ibino unu thöö i balwu. Kanya an acıdhö yo ië, un ba itwërö bino ië.”

22 Man ömıö ëtëla k'Eyuda openyere këngı nı, “Ën bino nekere këne? Man ënë tyën köp n'ömıö ën okobo nı, ‘Kanya an acıdhö yo ië un ba itwërö bino ië?’”

23 Yecu ömedërë nakun kobo nı, “Un iya unu ki i lobo piny; ëntö an aya ki malö. Un ibedo me lobo ni; ëntö an ba abedo me lobo ni.

24 Man ënë ömıö an akobo nı un ibino thöö i balwu gını; ka un ba iyee nı ‘An ënë An,’ adyer un ibino thöö i balwu gını.”

25 Ëtëla k'Eyuda openyo ën nı, “In inga?”

Yecu ögamö nı, “An ënë ngat na an abedo kobo niwu ki i acaki.

26 An atye ki köp na pol na myero akob i komwu na ngölö köp niwu. Ëntö ngat n'oora genere, ëka gin na an awinyo ki bothe, an akobo both jö me lobo.”

27 Gîn ba öniang nî Yecu onwongo tye ka kobo nîgî köp î kom Apap mërë.

28 Cë Yecu okobo nî, “Î karë na un ibino tingo Wod ka Dhanö malö, cë un ibino ngeo nî ‘An ënë An’ ëka nî an ba atimö gin mörö kî twëröna këna, ëntö atwakö ngö n'Apap opwonya ködë.

29 Ngat n'oora tye kanya acël köda; ën ba öwëka këna, piën î karë kibëc an atimö gin na yomo cwinye.”

30 Jö na pol n'owinyo Yecu ka twak oye gîni î kome.

Ëthinö k'Abraam

31 Cë Yecu okobo both Eyuda n'oye î kome nî, “Ka ilübö unu pwonyna, nwongo ibedo unu ëlëbköra adyer.

32 Un ibino ngeo köp adyer, ëka köp adyer bino gönyöwu.”

33 Gîn ögamö nî, “Wan ebedo ëkwaë k'Abraam ëka wan bara ebedo opii ka ngat mörö. In icakö kobo nî köp adyer bino gönyöwa nîngö?”

34 Yecu ögamö nî, “Akobo niwu köp adyer, ngat acëlacël na timö bal obedo opii ka bal.

35 Opii ba bedo î pacö mörö na twal, ëntö athîn më pacö bedo ië na twal.

36 Kömanön, ka Wod ögönyöwu, adyer nwongo dong ëgönyöwu.

37 An angeo nî un ibedo ëkwaë k'Abraam. Ëntö pod iyübërë unu më nekona, piën köpna ba dönyö î cwinywu.

38 An akobo niwu gin na an anënö kî both Apapna, ëntö un itimö gin na un iwinyo kî both apapwu.”

39 Gïn ögamö nï, “Abraam obedo apapwa.”

Yecu okobo nïgï nï, “Ka un onwongo ibedo ëthïnö k'Abraam, kono itimö unu gin n'Abraam ötimö.

40 Ëntö kobedini imitö unu nekona, an dhanö na kobo niwu köp adyer na an awinyo ki both Obanga. Abraam yam ba ötimö kömanön.

41 Un itye ka timö gin n'apapwu kikome timö.”

Gïn ögamö nï, “Wan ba ebedo ëthïn lek; wan etye k'Apapwa acël këkën na ënë Obanga kikome.”

Ëthïnö ka Catan

42 Yecu okobo nïgï nï, “Ka onwongo Obanga obedo Apapwu, kono imara unu, piën an aya ki both Obanga ëka kobedini an atye kany. An ba abino ki wia këna; ëntö ënë oora.

43 Pïngö ba inïang unu i köp na an akobo? Piën un ba itwërö winyo köp na an akobo.

44 Un iya ki both apapwu Catan, ëka imitö unu cobo miti k'apapwu. Ën onwongo obedo anak cön i acaki, ba kobo köp adyer, piën köp adyer ope bothe. Ka ën kobo köp më twodo nwongo obedo kite mërë, piën ën obedo atwodo ëka apap ka twodo.

45 An akobo niwu köp adyer ëntö un ba iyea!

46 Nga ki i kinwu na twërö nyutho bal mörö i koma? Ka an atwakö köp adyer, pïngö ba iyee unu i köp na an akobo?

47 Ngat mörö n'obedo dhanö k'Obanga winyo köp k'Obanga. Gin na miö un ba iwinyo piën un ba iya ki both Obanga.”

Yecu ëka Abraam

48 Eyuda n'onwongo pyem kī Yecu openyo gīnī nī, “Wan ba ekobo kōp atīr nī in ibedo dhanō mē Camaria ēka cen omaki?”

49 Yecu ōgamō nī, “An cen ba ōmaka, ěntō awörō Apapna ēka un ba iwōra.

50 An ba arangō dheo pīra kēna; ěntō ngat na rangō na kakara tye, ēka ěnē obedo angöl-kōp.

51 Adyer an akobo niwu nī, ka ngat mörō gwökō kōpna, ěn ba bino thōō na twal.”

52 Eyuda n'onwongo pyem kī Yecu okobo nī, “Kobedini wan dong ěnīang nī in cen omaki! Abraam yam ōthōō ēka edwarpīny thon, ěntō in ikobo nī, ‘Ka ngat mörō gwökō kōpna ba bino thōō na twal.’

53 In idit ilōō apapwa Abraam? Ěn yam ōthōō, ēka edwarpīny thon. In ithamō nī in ibedo nga?”

54 Yecu ōgamō nī, “Ka aketho dheo ī koma kēna, dheona nōn ba kōnyō. Apapna na un icwodo nī Obangawu ěnē ketho dheo ī koma.

55 Un ba ingeo unu ěn, an angeo ěn. Ka onwongo an akobo nī ba angeo ěn, kono abedo atwodo calō un. Ěntō an angeo ěn ēka agwökō kōp mērē.

56 Apapwu Abraam obino obedo kī yom cwiny nī ebino nēnō nīnōna; ěn ōnēnō cē cwinye obedo na yom.”

57 Ětēla k'Eyuda okobo nīnē nī, “In mwakani bara othuno pyer abic ēka in inēnō Abraam!”

58 Yecu ōgamō nī, “Adyer akobo niwu nī na pod bara ěnywölō Abraam, ‘An ěnē An.’ ”

59 Cē gīn ōkwanyō kite mē celo Yecu, ěntō ěn opono ēka ōya ōkō kī ī dyekal ōt k'Obanga.

9

Yecu öcangö athöö wang

¹ İ karë na Yecu tye ka woth k'ëlübköre, ën önënö ëcwö mörö n'ënywölö na wangë öthöö.

² Ëlübköre openyo ën nî, “Apwony, nga ënë öbalö, ëcwö ni onyo enyodo mërë, n'ömiö ënywölö ën na wangë öthöö?”

³ Yecu ögamö nî, “Ëcwö ni onyo enyodo mërë ba öbalö gîni, ëntö man ötimërë ëk tic k'Obanga onen i kome.

⁴ Onu myero eti tic ka ngat n'oora na ceng pod tye. Kiwor tye ka bino na ngat mörö ba twërö tic.

⁵ Ka an pod atye i lobo, an nwongo abedo tar më lobo.”

⁶ Kinge na Yecu okobo köp ni, ën öngülö laö dhögë pîny, önyöbö kî ngöm ëka opuo i wang ëcwö nön.

⁷ Cë Yecu okobo nîne nî, “Cîdhî ilwök wangi i kulo më Ciloam” (na tyën köp mërë gönyö nî “n'eoro”). Ën öcîdhö, ölwökö wangë ëka odwogo na wangë dong neno.

⁸ Jö na bedo na cwök ködë ëka jö n'onwongo nënö ën ka kwaö kwac openyere gîni nî, “Pathî ëcwö ni ënë onwongo marö bedo cë kwaö kwac?”

⁹ Jö mökö okobo nî ën önön.

Jö nökenë okobo nî, “Pathî ën cal acala ködë.”

Ëntö athöö wang ögamö dhögi nî, “An önön.”

¹⁰ Gîn openyo ën nî, “Wangi öyabërë nîngö?”

¹¹ Ën ögamö nî, “Ëcwö n'ecwodo nî Yecu önyöbö cwodho cë opuo i wanga, ëka okobo nîna nî acîdhî alwök wanga i kulo më Ciloam. Cë acîdhö alwökö wanga ëka acakö neno.”

12 Gĩn openyo ẽn nĩ, “Ɛn tye kwene?”
Athöö wang ögamö nĩ, “An ba angeo.”

Eparicayo openyo athöö wang n'ẽcangö

13 Gĩn otero ẽcwö n'onwongo wangẽ öthöö both
Eparicayo.

14 Ninö na Yecu önyöbö cwodho cẽ öcangö kĩ
wang athöö wang onwongo obedo ceng Cabĩt
k'Eyuda.

15 Pĩ manön Eparicayo openyo athöö wang kite
na wangẽ öyabërẽ ködẽ. Ɛn okobo nĩgĩ nĩ, “Ɛn opuo
cwodho i wanga, ẽka alwökö cẽ acakö neno.”

16 Cẽ Eparicayo mökö öcakö kobo nĩ, “Dhanö ni
ba öya kĩ both Obanga piẽn ba gwökö cik mẽ ceng
Cabĩt k'Eyuda.”

Ɛntö Eparicayo nökenẽ openyo nĩ, “Dhanö
n'obedo abal twërö tio anyuth mẽ tango na röm kĩ
man?” Cẽ ömöö apokapoka obedo na tye i kin-gĩ.

17 Cẽ Eparicayo dökĩ openyo athöö wang nĩ,
“Thamani tye nĩngö i kom dhanö ni n'öyabö
wangi?”

Ɛcwö ögamö nĩ, “Ɛn obedo adwarpĩny.”

18 Ɛtëla k'Eyuda ba oyee gĩnĩ nĩ ẽn onwongo
wangẽ öthöö ẽka nĩ ẽyabö wangẽ, naka ömöö ec-
wodo enyodo mërẽ.

19 Gĩn openyo enyodo mërẽ nĩ, “Man wodwu na
un ikobo nĩ ẽnywölö na wangẽ öthöö? Ngö ẽnẽ
ömöö ẽn kobedini dong nënö pĩny?”

20 Enyodo mërẽ ögamö nĩ, “Wan engeo nĩ man
obedo wodwa ẽka ẽnywölö ẽn na wangẽ öthöö.

21 Ëntö kite na kobedini dong nënö kî pîny ködë, wan ba engeo ëka ba engeo ngat n'öyabö wangë. Peny unu ën. Ën dong dit; ën römö twak pîrë kënë.”

22 Enyodo mërë okobo kömanön piën onwongo lworö gîni ëtëla k'Eyuda, piën gîn onwongo öyübö köp nî ka ngat mörö otuco nî Yecu ënë Meciya, ebino ryëmö ökö kî i cinagoga.

23 Manön ënë ömïö enyodo mërë okobo nî, “Ën dong dit; peny unu ën.”

24 Gîn dökî ocwodo athöö wang tyën më ariö cë okobo gîni nîne nî, “Mii dheo both Obanga nakun ikobo köp adyer, wan engeo nî dhanö nî n'öyabö wangi obedo abal.”

25 Ën ögamö nî, “Ka ën obedo abal, an ba angeo. Gin na an angeo ënë nî: an onwongo wanga öthöö, ëntö kobedini an dong aneno!”

26 Cë gîn openyo ën nî, “Ngö na ën ötimö i komi? Ën öyabö wangi nîngö?”

27 Ën ögamö nî, “An dong akobo niwu ökö ëka ba iwinyo unu. Pîngö pod dökî imitö unu winyo? Un thon imitö bedo ëlëbkörë?”

28 Cë gîn öyanyö ën nakun kobo gîni nî, “In ënë ibedo alëbkörë, ëntö wan ebedo ëlëbkör Muca!

29 Wan engeo nî Obanga yam ötwak kî Muca, ëntö dhanö nî, wan ba engeo kanya ën öya kî ië.”

30 Ngat na wangë onwongo öthöö ögamö nî, “Man obedo köp më aura rwök! Un ba ingeo unu kanya ën öya kî ië, ëntö ën öyabö wanga.

31 Wan engeo nî Obanga ba winyo ëbal ëntö winyo dhanö na lworö ën ëka timö gin na ën mitö.

32 Anaka yam wan bara ewinyo nî ngat mörö öyabö wang dhanö n'ënywölö na wangë öthöö.

³³ Ka dhanö ni onwongo ba öya ki both Obanga, onwongo ba twerö timö gin mörö.”

³⁴ Gin ögamö ni, “In onwongo enyvoli i bal—in itwerö pwonyowa ningö?” Cë gin öryëmö ën yökö.

Thöö wang më cwiny

³⁵ I karë na Yecu owinyo ni ëryëmö dhanö nön yökö, ën onwongo cë openyo ën ni, “In iyee i kom Wod ka Dhanö?”

³⁶ Eëcwö ögamö ni, “Adwong, nga ënön? Kob nina ëk ayee i kome.”

³⁷ Yecu okobo ninë ni, “In dong inënö ën; i adyer, ënë ngat na tye ka twak kodi.”

³⁸ Cë ëcwö okobo ni, “Rwoth, an ayee,” ëka öwörö ën.

³⁹ Yecu okobo ninë ni, “An abino ëk jö më lobo ni ëngöl köp nigî. Eë ëthöö wang önën piny, ëka jö na wang-gi neno bino bedo ëthöö wang.”

⁴⁰ Eparicayo mökö n'onwongo tye kanya acël ködë owinyo ginî köp na ën okobo ëka openyo ginî ni, “Wan thon wangwa öthöö?”

⁴¹ Yecu ögamö nigî ni, “Ka onwongo wangwu öthöö, kono ba itye unu ki bal, ëntö un ikobo ni, ‘Wan ënënö piny,’ pi manön balwu pod dong bedo.

10

Carolok i kom akwath

¹ “An akobo niwu köp adyer, ngat na ba dönyö ki i dhö anok ëntö idhö i anok ki kany nökenë, nwongo obedo akwo ëka ayak.

² Eëntö ngat na dönyö ki i dhö anok ënë akwath ka rom mërë.

³ Ngat na gwökö anok yabö dhö anok n'akwath, ëka rom winyo dwön akwath. Ën cwodo rom mërë kî nyîng-gî ëka tëlö wigî yökö.

⁴ Ka dong okelo rom mërë kibëc yökö, ën tëlö wigî anyim, ëka rom mërë lübö körë piën gîn ngeo dwönë.

⁵ Gîn ba bino lübö kör ngat na path; ëntö rîngö gîni ökö kî bothe piën gîn ba ngeo dwönë.”

⁶ Yecu okobo carolok ni bothgî, ëntö gîn ba öniang i tyën köp na ën onwongo tye ka kobo bothgî.

⁷ Pî manön Yecu dökî okobo nîgî nî, “Adyer an akobo niwu nî an ënë dhö anok ka rom.

⁸ Jö kibëc n'öcakö gîni bino i nyima onwongo obedo gîni ekwoe ëka ëyak, ëntö rom ba owinyogî.

⁹ An ënë dhö anok; ka ngat mörö ödönyö kî botha, ën bino larë. Ën bino donyo ëka dönyö yökö cë cîdhö nwongo cem.

¹⁰ Akwo bino më kwalö, neko ëka tyeko kékën; an abino ëk gîn onwong kwö, ëka obed gîni kî kwö n'opong.

¹¹ “An abedo akwath na bër. Akwath na bër jalö kwö mërë pî rom.

¹² Ngat n'epango apanga ba obedo akwath ëka rom ba obedo mëgë kikome. Ka önönö orudi tye ka bino, wökö rom ëka ngwëcö ökö. Orudi makö rom cë këthögî ökö.

¹³ Ën ngwëcö ökö piën epango ën apanga ëka ba parö gin mörö i kom rom.

¹⁴ “An abedo akwath na bër; an angeo romna ëka romna ngea gîni—

¹⁵ kite na calö Apapna ngea ëka an angeo Apap, an ajalö kwöna më thöö pî rom.

¹⁶ An atye kī rom nōkēnē na ba obedo gīnī mē anok ni. Myero acīdh ēk akelgī thon. Gīn thon bino winyo dwōna, ēka bino bedo gīnī ōthīpan acēl k'akwath acēl.

¹⁷ Man ēnē gīn n'ōmīō Apapna mara piēn an ajalō kwōna—ēk anwong dōkī.

¹⁸ Ngat mōrō ope na twērō kwanyō kwōna ōkō kī botha, an ajalō ōkō kēna. An atye kī twēr mē jalō ēka an atye kī twēr mē nwongo dōkī. An anwongo cīk ni kī both Apapna.”

¹⁹ Ī karē na Yecu okobo kōp ni kībēc, apokapoka dōkī ōcakērē ĩ kin Eyuda.

²⁰ Jō na pol kī ĩ kin-gī okobo nī, “Ēn obedo ngat na cen ōmakō ēka obedo apoa. Pīngō iwinyo unu ēn?”

²¹ Jō nōkēnē okobo nī, “Kōp ni ba obedo mē ka dhanō na cen ōmakō. Cen twērō yabō wang dhanō nīngō?”

Ētēla k'Eyuda ōkwērō gīnī Yecu

²² Ī karē nōn karama mē Kwero Ōt k'Obanga ōtīmērē ĩ Jerucalem, ēka onwongo obedo ĩ karē mē cwīr.

²³ Yecu onwongo tye ka woth ĩ dyekal ōt k'Obanga ĩ thē ōt ka Colomon.

²⁴ Ētēla k'Eyuda ōcōkērē gīnī ēka ēgūrō ēn dyere, cē openyo gīnī ēn nī, “Ībino mīōwa bedo k'akalakala pī karē na rōm kwene? Ka in ēnē Meciya, kob nīwa kanyalēr.”

²⁵ Yecu ōgamō nīgī nī, “An dong atyeko kobo niwu ōkō ēntō un ba iyee unu. Tic na an atio kī nyīng Apapna ēnē obedo caden-na.

²⁶ Ēntō un ĩkwērō unu yee piēn ba ibedo unu romna.

²⁷ Romna winyo dwöna; an angeogi, ëka lübö gini köra.

²⁸ An amögi kwö na ba thum, ëka gin ba bino thö; ngat mörö ope na twerö maögi ökö ki i cinga.

²⁹ Apapna n'ömiögi i cinga dit na löö jami kibec. Ngat mörö ope na twerö maögi ökö ki i cing Apapna.

³⁰ Apapna ëka an etye acel."

³¹ Eëla k'Eyuda doki ökwanyö kite më celo Yecu,

³² ëntö ën okobo nigini, "An dong atyeko nyutho niwu tango më aura na pol n'öya ki both Apap. Pi tango mëne na un imitö celona ki kite ië?"

³³ Eëla k'Eyuda ögamö ni, "Wan ba ebino celoni ki kidi pi tango mörö na ber ëntö pi yanyö Obanga. In ibedo dhanö adhana ëntö ikobo keni ni in ibedo Obanga."

³⁴ Yecu ögamö nigini, "Eëö i Cikwu ni Obanga okobo ni, 'Un ibedo obanga gini.'

³⁵ Un ingeo ni Cöc na Leng ba bino lökerë. Ka jö n'ögamö gini köp k'Obanga ecwodogi ni 'obanga gini,'

³⁶ pingö dong un ikobo ni an ayanyö Obanga ka an akobo ni, 'An abedo Wod k'Obanga'? Kad bed ni kömanön, Apap öyëra ëka oora i wi lobo ni.

³⁷ Ka an ba atio tic k'Apapna, cë myero kür iyee unu an.

³⁸ Eëntö ka an atio tic mërë, kad bed ba iyee unu an, cë myero iyee unu tango na an atio, ëk iniang unu ni Apap tye i an, ëka an atye i Apap."

³⁹ Gin doki ötëmö më makö ën ëntö ën ölüü ökö ki i kin-gi.

⁴⁰ Cē Yecu ödök cen i löka kulo Jordan kanya Jon onwongo batica jii ië cön, cē obedo kunön.

⁴¹ Jö na pol obino bothe cē okobo gini ni, “Jon yam ba otio anyuth më tango mörö, ëntö gin na kibëc na Jon okobo i kom dhanö ni onwongo tye atir.”

⁴² Cē jö na pol n'onwongo tye kunön oyee gini i kom Yecu.

11

Thöö ka Lajaro

¹ Ecwö na nyingë Lajaro onwongo two. En onwongo obedo dhanö më Betania i pacö ka Maria gin k'amïn mërë Martha.

² Maria ni ënë onwongo obino owiro Rwoth ki möö na ngwece kur ëka odunyo tyën Yecu ki yer wie. Ömïn mërë Lajaro ënë onwongo two.

³ Amego mërë ooro köp both Yecu ni, “Rwoth, okoneni na in imarö two.”

⁴ I karë na Yecu owinyo köp ni, ën okobo ni, “Two ni ba obino më neko ën ëntö obino më kelo dheo both Obanga ëk pïrë Wod k'Obanga onwong dheo.”

⁵ Yecu onwongo marö Martha gin k'amïn mërë ëka Lajaro.

⁶ Entö i karë n'owinyo ni Lajaro two, ën ömëdërë më bedo kanya ën onwongo tye ië pi ninö ariö.

⁷ Kinge, ën okobo both ëlëbkörë ni, “Eru ödök cen yo Yudea.”

⁸ Elëbkörë ögamö ni, “Apwony, ëtëla k'Eyuda onwongo pod i caa ni mitö celoni ki kidi. In dök i imitö dök yo kunön?”

⁹ Yecu ögamö nî, “Caa më kiceng ba tye apar wie ariö? Dhanö na wotho kiceng ba cwanyërë, piën ën neno kî tar më lobo nî.

¹⁰ Ëntö ka ën wotho kiwor, ën cwanyërë piën ën nwongo ope kî tar.”

¹¹ Kinge na ën okobo köp nî, ën ömëdërë nakun kobo nîgî nî, “Okone onu Lajaro tye ka nînö; ëntö an acidhö kunön më coo ën ökö.”

¹² Ëlübörë ögamö nî, “Rwoth, ka ën tye ka nînö, ën bino cang.”

¹³ Yecu onwongo tye ka twak pî thöo ka Lajaro, ëntö ëlübörë onwongo thamö gîñî nî önînö anîna.

¹⁴ Cë Yecu okobo nîgî kanyalër nî, “Lajaro öthöo dong ökö,

¹⁵ ëntö pî un, an cwinya yom piën onwongo ba atye kunön ëk iyee unu. Eru ëcidh yo bothe.”

¹⁶ Cë Tomaci (n'ecwodo nî Rudi) okobo both ewodhe n'obedo ëlübör Yecu nî, “Eru thon ecidhu, ëk ëthöo kanya acël ködë.”

Yecu ënë cer ëka kwö

¹⁷ Ì karë na Yecu othuno ì Betania, ën onwongo Lajaro dong orii ì lyël pî nînö angwën.

¹⁸ Betania onwongo cwöcwök kî Jerucalëm na bor mërë römö kilomita adek,

¹⁹ ëka Eyuda na pol onwongo obino gîñî both Martha ëka Maria më kweo cwinygî pî thöo k'ömîñ-gî.

²⁰ Ì karë na Martha owinyo ni Yecu tye ka bino, ën ödönyö yökö më cidhö romo ködë, ëntö Maria onwongo odong ì öt.

²¹ Martha okobo both Yecu nî, “Rwoth, kono onwongo itye kany kono ömëra ba öthöo.

22 Ëntö an angeo nĩ Obanga bino mĩöni gin mörö kēkēn na in ibino penyo kadĩ kobedini.”

23 Yecu ögamö nĩnē nĩ, “Omeru bino cer dōkĩ.”

24 Martha ögamö nĩ, “An angeo nĩ ěn bino cer dōkĩ ĩ nĩnō mē ajiki n'ebino cero kĩ jō n'öthöo kibēc.”

25 Yecu okobo nĩnē nĩ, “An ěnē cer ěka kwö. Ngat na yee ĩ koma kadĩ öthöo, bino kwö.

26 Jō kibēc na kwö ěka yee gĩnĩ ĩ koma ba bino thöo. In iyee köp ni?”

27 Martha ögamö nĩnē nĩ, “Eyo, Rwoth, an ayee nĩ in ěnē Meciya, Wod k'Obanga n'onwongo myero obin ĩ lobo.”

28 Kinge na ěn dong ötwakö köp ni, ěn ödök cen ĩ öt, cē ocwodo amĩn mērē Maria thenge ěka okobo nĩnē nĩ, “Apwony tye kany, ěka tye ka cwodoni.”

29 Cücüth na Maria owinyo köp ni, ěn öya malö pĩöpĩö ěka öbünyö cidhö yo bothe.

30 Yecu onwongo bara ödönyö ĩ pacö, ěntö onwongo pod tye kanya Martha oromo ködē iē.

31 ĩ karē na jĩĩ n'onwongo tye gĩnĩ ka kweo cwiny Maria ĩ öt, önēnō kite na ěn öbünyö yaa malö pĩöpĩö mē dönyö yökö, gĩn ölübö körē nakun thamö gĩnĩ nĩ ěn onwongo tye ka cidhö mē koko ĩ wi lyēl.

32 ĩ karē na Maria othuno kanya Yecu onwongo tye iē, ěn oryebere pĩny ĩ nget tyēn Yecu ěka okobo nĩnē nĩ, “Rwoth, ka onwongo itye kany kono ömēra ba öthöo.”

33 ĩ karē na Yecu önēnō ka ěn tye ka koko ěka jō n'ölübö körē thon tye gĩnĩ ka koko, cwinye opodho ěka iē thon öwang rwök.

34 Cē openyo nĩ, “Un iketho kome kwene?”

Gĩn ögamö nĩ, “Rwoth, bin ěk inēn.”

³⁵ Yecu okok.

³⁶ Cē Eyuda okobo gīnī nī, “Nēn kite na ēn marō kī ēn kōdē!”

³⁷ Ēntō jō mōkō kī i kin-gī okobo gīnī nī, “Man ēnē ngat n'ōmīō athōō wang ōnēnō pīny. Ēn onwongo ba twērō jūkō thōō kī i kom Lajaro?”

Yecu ocerō Lajaro kī i thōō

³⁸ Yecu iē ōwang rwōk dōkī, cē obino i dhō bur lyēl. Bur lyēl nōn onwongo obedo rwo n'egworo agwora ēka eloro dhōgē kī kidi.

³⁹ Yecu okobo nīgī nī, “Thwar unu kidi ōkō.”

Martha amīn athōō ōgamō nī, “Rwoth, kobedini dong ngwe, piēn dong orii i lyēl pī nīnō angwēn.”

⁴⁰ Cē Yecu okobo nīnē nī, “An ba akobo nini nī ka in iyee, in ibino nēnō dheo k'Obanga?”

⁴¹ Cē gīn ōkwanyō kidi ōkō. Yecu otingo wangē malō cē okobo nī, “Apap, an apwoi nī in iwinya.

⁴² An angeo nī in iwinya karē kībēc, ēntō an akobo kōp nī pī jō n'ocung gīnī i ngeta kany, ēk gīn oyee nī in ēnē i oora.”

⁴³ Kinge na Yecu okobo kōp nī, ēn oredo kī dwōn na malō nī, “Lajaro, donyi yōkō!”

⁴⁴ Ngat n'onwongo ōthōō ōcakō donyo yōkō nakun cīngē kī tyēnē eboo kī bōngū, ēka wangē eboo k'atam.

Yecu okobo nīgī nī, “Gōny unu bōng mē lyēl ōkō ēka imīi unu ēn ōcīdhī.”

Ēyūbō kōp mē neko Yecu

⁴⁵ Eyuda na pol n'onwongo obino gīnī both Maria ōnēnō ngō na Yecu otio cē oyee gīnī i kome.

⁴⁶ Ēntō jō mōkō kī i kin-gī ōcīdhō gīnī both Eparicayo cē okobo nīgī ngō na Yecu otio.

47 Cē ēlamdhök na dito ēka Eparicayo ocwodo gīnī athuko mē öd Okiko k'Edong ēka okobo gīnī nī, “Ngö na onu ebino timö? Dhanö ni tye ka tio anyuth mē tango na pol.

48 Ka onu ēwēkö ēn kī tic mērē nōn, jö kibēc bino yee i kome, cē wēkö jö Roma bino kēthö gīnī kabedo onu na leng ēka lobo onu ökö.”

49 Cē ngat acēl kī i kin-gī na nyīngē Kayapa, n'onwongo obedo Alamdhök na Dit i mwaka nōn, okobo nī, “Un ba ingeo gin mörö na twal!

50 Un myero inge nī bino bedo na bēr bothwu ka dhanö acēl öthöo pī jīi ek kür etyek rok onu ökö kibēc.”

51 Ēn ba okobo köp ni pīrē kēnē, ēntö na calö Alamdhök na Dit i mwaka nōn, ēnē ömīö ēn odwaro nī Yecu bino thöo pī rok k'Eyuda,

52 ēka pathī pī rok nōn kēkēn ēntö thon mē cökö ēthīnö k'Obanga n'ökēth gīnī kanya acēl ēka mē mīögī bedo acēl.

53 Cakērē i nīnō nōn cīdhö ködē anyim, etēla k'Eyuda öcakö gīnī yübö köp mē neko Yecu.

54 Pī manōn, Yecu ba dökī obedo woth kanyalēr i kin Eyuda, ēntö öya ökö kī kunōn cē öcīdhö i kabedo na cwök kī thim i pacö n'ecwodo nī Epraim, kanya ēn obedo iē k'ēlūbkörē.

55 I karē na karama mē Poth k'Eyuda onwongo dong cwök, jö na pol öya gīnī kī i peci na karē mē Poth bara örömö, cē öcīdhö gīnī yo Jerucalēm ek ēlönyērē gīnī kēn-gī.

56 Gīn ömēdērē mē rangö Yecu nakun ekürö ēn i dyekal öt k'Obanga. Gīn openyere i kin-gī kēn-gī nī, “Un iθhamö nīngö? Ēn ba twērö bino i karama?”

⁵⁷ Ëlamdhök na dito ëka Eparicayo onwongo öcökö gini nĩ ka ngat mörö ngeo kanya Yecu tye ië, myero okob nigi ëk gin ecidh ëmak ën.

12

Ewiro Yecu ki möö i Betania

¹ Na ninö abicël më thuno i karama më Poth bara örömö, Yecu othuno i Betania kanya Lajaro na ën ocero ki i kin jö n'öthöö onwongo bedo ië.

² Cem më kothyeno onwongo ëyübö nĩ Yecu kunön. Martha ënë onwongo poko cem, ëka Lajaro onwongo obedo ngat acël i kin jö n'onwongo obedo i dhö mëja më cem kanya acël ki Yecu.

³ Cë Maria ökwanyö möö narad na ngwece kur, na wel mërë tøk na römö nucu lita cë owiro ki tyën Yecu ëka odunyo ki yer wie. Ngwece möö na kur örömö i öt kibëc.

⁴ Ëntö Yuda Ikariot n'obedo ngat acël i kin ëlübörë ëka na bino ketho örörö i kom Yecu, openyo nĩ,

⁵ “Pिंगö ba ecadh möö na kur ni i wel më denario mia adek ëk ëmĩ both ecan?”

⁶ Yuda okobo kömanön piën ën onwongo ba parö pi ecan, ëntö onwongo obedo akwo; ënë onwongo gwökö ocwe më lim ëka könyërë ki i gin n'eketho ië.

⁷ Yecu ögamö nĩ, “Wëk unu ën kënë. Ën ötimö man pi yübö ninö më ikona.

⁸ Un ibedo k'ëcan ninö kibëc, ëntö un ba ibino bedo köda ninö kibëc.”

⁹ I karë na lwak k'Eyuda öniang gini nĩ Yecu onwongo tye kunön, gin obino pathi më nönö Yecu këkën ëntö më nönö Lajaro thon, na Yecu ocero ki i kin jö n'öthöö.

¹⁰ Cē ēlamdhök na dito öyübö gini köp mē neko Lajaro thon,

¹¹ piēn Eyuda na pol öya ökö ki i körgi pirē ēka oketho gini yeegi i kom Yecu.

Yecu ödönyö i Jerucalem na calö Rwoth

(Matayo 21:1-11; Marako 11:1-11; Luka 19:28-40)

¹² Kodiko mērē, lwak na pol n'onwongo obino gini i karama owinyo gini nī Yecu tye ka bino yo Jerucalem.

¹³ Gin öjakö jang ötīt gini cē öcīdhö gini ködē mē romo ki Yecu nakun wöö gini nī,
“Ocana!”

“Gum obed i kom ngat na bino ki nyīng Rwoth!”

“Gum obed i kom Rwoth mē Icarael!”

¹⁴ Yecu onwongo athīn kana cē obedo i ngee, kite na yam ecöö ködē nī,

¹⁵ “Kür ibed unu ki lworō, un jö mē Cion;
nēn, Rwothwu tye ka bino,
nakun obedo i ngee athīn kana.”

¹⁶ I karē nōn elübkörē onwongo ba öniang gini i köp ni kibēc, entō na dong eketho dheo i kome, cē gin dong opo nī yam ecöö köp ni gini ēka ötimērē i kome.

¹⁷ Lwak n'onwongo tye bothe i karē na en cwodo Lajaro ki i lyel ēka ocero en ki i kin jö n'öthöö, ömēdērē gini mē rwēö köp i kom gin n'ötīmērē.

¹⁸ Jö na pol öcīdhö gini mē romo ködē piēn gin owinyo nī en otio anyuth mē tango nī.

19 Cë Eparicayo ötwak i kin-gi kën-gi ni, “Gin mörö ope na onu ëtwërö timö. Nën unu kite na jö kibëc dong ölökerë më lübö körë!”

Yecu okobo pi thöo mërë

20 I kin jö n'onwongo öcïdhö ginï më wörö Obanga i nïnö më Karama më Poth, onwongo jö mökö obedo Erok.*

21 Gin öcïdhö both Pilipo n'onwongo obedo dhanö më Bethecaïda na tye i Galilaya, cë okobo ginï ni, “Adwong, wan ëmitö nënö Yecu.”

22 Pilipo öcïdhö okobo both Anderiya; cë Anderiya ëka Pilipo öcïdhö okobo ginï both Yecu.

23 Yecu ögamö nigï ni, “Caa örömö dong ökö pi Wod ka Dhanö më nwongo dheo.

24 Adyer an akobo niwu ni ka nyig kodhi ba opodho i ngöm cë öthöö, bino dong ki nyige acël këkën. Ëntö ka öthöö, cë bino nyakö nyige na pol.

25 Ngat na marö kwö mërë bino rwenyo kwö mërë, ëka ngat na dag kwö mërë i lobo ni bino gwökö kwö mërë thuno ködë naka i kwö na ba thum.

26 Ka ngat mörö tio pïra, ën myero ölüb köra; ëka kanya an abedo ië, aticna thon bino bedo ië. Apapna bino wörö ngat na tio pïra.

27 “Kobedini cwinya cwer, ngö na an abino kobo? ‘Apap, lara ki i caa ni?’ Pe, man ënë tyën köp n'ömiö an abino.

28 Apap, keth dheo i nyingi.”

Cë dwön öya ki i polo na kobo ni, “An dong aketho dheo i nyinga, ëka abino ketho dheo ië dökï.”

* 12:20 12:20 **Erok**Man obedo jö Girik.

²⁹ Lwak n'onwongo ocung gīnī kany nōn owinyo cē okobo gīnī nī kōth ēnē omor; jō nōkēnē nī malaika ötwak ködē.

³⁰ Yecu okobo nī, “Dwōn ni ba obino pīra, ēntō pīrwu.

³¹ Kobedini caa örömō ökö mē ngölō köp i kom lobo ni; ēka alōc mē lobo ni ebino bolo ökö.

³² I karē n'ebino tingona malō mē yaa kī i lobo ni, an abino mīō jō kībēc bino yo botha.”

³³ Ēn okobo köp ni mē nyutho kit thōō na ēn ebino thōō ködē.

³⁴ Lwak ögamō nī, “Wan ewinyo kī i Cīk nī Meciya bino bedo naka naka. Pīngō in ikobo nī, ‘Wod ka Dhanō myero eting malō’? ‘Wod ka Dhanō’ ni ēnē nga?”

³⁵ Cē Yecu okobo nīgī nī, “Pod itye unu kī tar pī karē na nōnōk. Woth unu na pod itye unu i tar, na bara cōl pīny oumowu. Ngat na wotho i cōl pīny ba ngeo kanya ēn cīdhō yo iē

³⁶ Keth unu yeewu i tar nakun itye unu ködē, ēk ibed unu ēthīnō mē tar.” Kinge na Yecu okobo köp nōn, ēn öya öcīdhō cē opono ökö nīgī.

Eyuda ba oyee i kom Yecu

³⁷ Kadī bed Yecu otio anyuth mē tango na pol bothgī, jō na pol pod ömēdērē mē kwērō yee i kome.

³⁸ Man ötimērē ēk köp n'adwarpīny Icaya okobo ocobere nī:

“Rwoth, nga n'oye köp na wan ētītō

ēka nga na cīng Rwoth mē tēkö onyuthere
bothe?”

³⁹ Manön enë ömïö gïn ba tye ka yee piën Icaya okobo dökï nï,

⁴⁰ “Rwoth oneko wang-gï ökö,
ëka ömïö cwinygï ödökö na nwang,

ëk kür onen kï wang-gï
onyo öniang gïñ kï cwinygï,
onyo më lökërë dwogo botha ëk acang-gï.”

⁴¹ Icaya okobo köp nï piën ën onwongo önenö dheo ka Yecu ëka ötwak i kome.

⁴² Jö na pol kï i kin ëlöc oyee i kome Yecu, ëntö pï lworö Eparicayo, ömïö gïn ba otuco yeegï ëk kür ëryëmgï ökö kï i cinagoga.

⁴³ Piën gïn marö pak na dhanö ketho i komgï na löö pak n'Obanga mïö.

⁴⁴ Cë Yecu oredo both lwak na kobo nï, “Ka ngat mörö oyee i koma, nwongo ba oyee i koma këkën, ëntö nwongo oyee i kom ngat n'oorä.

⁴⁵ Ka ngat önëna, ën thon nënö ngat n'oorä.

⁴⁶ An abino i wi lobo calö tar, ëk ngat mörö na yee i koma kür obed i cöl pïny.

⁴⁷ “Ka dhanö mörö winyo köpna ëka ba lübögï, an ba abino ngölö köp nïñë. Piën an ba abino më ngölö köp both jö më lobo, ëntö më larö lobo.

⁴⁸ Ëntö jö kibëc na kwëra ëka ba yeo gïñ köpna; köp na an atwakö bino ngölö köp nigï i nïñö më ajiki.

⁴⁹ An ba atwak kï twëröna. Apap n'oorä öcïka ngö na myero an atwakï ëka kite na myero atwak ködë.

⁵⁰ Ëka an angeo nï gin n'Apap öcïka më twakö tero jö i kwö na ba thum. Gin na an akobo, enë gin n'Apap okobo nïna nï an akobi.”

13

Yecu ölwökö tyën ëlëbkörë

¹ Na bara nīnō mē kwero karama mē Poth othuno, Yecu onwongo ongeō nī caa mērē örömō dong mē wēkö lobo nī mē cīdhō both Apap. Ēn onwongo ömarō ëlëbkörë na tye ī lobo, ëka onyutho nīgī mar mērē naka ī ajiki.

² Ī karē na gīn tye ī dhō cem mē kothyeno, Catan onwongo oketho thama ī cwiny Yuda, wod ka Cimon Ikariot, mē ketho örörō ī kom Yecu.

³ Yecu onwongo ongeō nī Apap otyeko mīō jami kībēc ī thē twēr mērē, ëka nī ěn ěya kī both Obanga ëka onwongo etye ka dök yo both Obanga.

⁴ Ēn öya malō kī ī dhō cem, ögönyō böngü mērē mē yökō, ëka otweo taulo ī wang pyērē.

⁵ Kinge, ěn öönyō pii ī bēcēn. Cē öcakō lwökō tyën ëlëbkörë, ëka odunyo kī taulo na ěn onwongo otweo ī wang pyērē.

⁶ Ī karē na Yecu othuno both Cimon Petero, Petero okobo nīnē nī, “Rwoth, in ibino lwökō tyēna?”

⁷ Yecu ögamō nī, “In ba itye ka nīang ī gin na an atye ka tīmō kobedini, ěntō in ibino nīang kinge.”

⁸ Petero okobo nīnē nī, “Pe, in ba ibino lwökō tyēna na twall!”

Yecu ögamō nīnē nī, “Ka an ba alwoki, ba ibino bedo alëbköra.”

⁹ Cē Cimon Petero ögamō nī, “Rwoth pathī tyēna kēkēn, ěntō cīnga ëka wia thon!”

¹⁰ Yecu ögamō nī, “Dhanō na dong otyeko lwök ökö, ba dökī lwökō kome ěntō tyēnē kēkēn; pīēn nwongo kome kībēc dong leng. Un dong ileng, ěntō pathī un kībēc.”

¹¹ Yecu onwongo ngeo ngat na bino ketho örörö i kome, ënë ömiö ën okobo ni, “Pathi un kibëc ënë ileng unu.”

¹² I karë na dong otyeko lwökö tyën-gi, ën oruko böng mërë ëka ödök obedo i kabedo mërë cë openyogi ni, “Iniang unu i ngö na an atimö i komwu?”

¹³ Un icwoda unu ni ‘Apwony’ ëka ‘Rwoth,’ manön tye atir piën manön ënë nga na an abedo.

¹⁴ Dong ka an, abedo Rwothwu ëka Apwonywu, alwökö tyënwu, un thon myero ilwök unu tyën ngat acëlacël.

¹⁵ An anyutho niwu apor më alüba ëk un thon itim unu kite na an thon atimö ködë i komwu.

¹⁶ Adyer an akobo niwu ni opii mörö ope na dit na löö adwong mërë, onyo aor mörö ope na dit na löö ngat n'ooro ën.

¹⁷ Kobedini na dong ingeo unu köp ni gini, ibino unu bedo ki gum ka iketho unu i tic.

Yecu okobo nga na bino ketho örörö i kome

¹⁸ “An ba atye ka kobo köp ni i komwu kibëc; an angeo jö na an dong ayëro. Ëntö ëk Cöc na Leng ocobere kakarë ni: ‘Ngat n'ocemo köda öläkërë i koma.’

¹⁹ “An akobo niwu kobedini na bara ötimërë, ëk ka bino timërë, iyee unu ni ‘An ënë An.’

²⁰ Adyer an akobo niwu ni ngat na jölö dhanö na an aoro, nwongo öjöla thon; ëka ngat na jöla, nwongo öjölö ngat n'ooro.”

²¹ Kinge na Yecu okobo köp ni, cwinye ocwer rwök cë okobo both ëlëbkörë kanyalër ni, “Adyer,

an akobo niwu ni ngat acël ki i kinwu bino ketho örörö i koma!”

²² Elübkörë öcakö ripërë gini kën-gi, piën gin ba öniang nga na en tye ka twak i kome.

²³ Ngat acël ki i kin elübkörë na Yecu onwongo marö rwök onwongo obedo na cwök ködë i dhö cem.

²⁴ Cimon Petero ögwëlö en ek openy Yecu ni nga na en tye ka twak i kome.

²⁵ Cë alübkör Yecu n'obedo na cwök ködë, openyo en ni, “Rwoth, nga enön?”

²⁶ Yecu ögamö ni, “Obedo ngat na an abino miö ogati ni ka an alutho i bakuli.” Cë Yecu olutho ogati i bakuli ëka ömiö both Yuda, wod ka Cimon Ikariot.

²⁷ Cücüth na Yuda ögamö ogati, Catan ödönyö i cwinye.

Cë Yecu okobo ninë ni, “Gin na in imitö timö, tim ökö piöpjö.”

²⁸ I kinjö n'onwongo obedo i dhö cem, ngat mörö ope n'öniang pingö Yecu okobo ninë kömanön.

²⁹ Kite na Yuda enë onwongo gwökö ciling, jö mökö öthamö ni Yecu onwongo tye ka kobo ninë më wilö gin mörö na mitërë pi karama, onyo më miö gin mörö both ëcan.

³⁰ Cücüth na Yuda ögamö ogati, en ödönyö yökö piöpjö. Piny onwongo dong cöl.

Yecu okobo ni Petero bino kwërönë

³¹ I karë na Yuda öcïdhö ökö, Yecu okobo ni, “Kobedini dong eketho dheo i kom Wod ka Dhanö ëka pirë ebino ketho dheo i kom Obanga.

³² Ka eketho dheo i kom Obanga pirë, Obanga thon bino ketho dheo i kom Wod pirë kënë, ëka bino ketho dheo i kome piöpjö.

³³ “Ēthīnōna, an abino bedo kodwu pī karē na nōnōk. Un ibino rangōna, ēka kite na an akobo kōdē both ētēla k'Eyuda, an thon akobo niwu kobedini: Kanya an acīdhō yo iē, un ba itwērō bino iē.

³⁴ “Kobedini an amiōwu cīk na nyen: Marē unu kenwu. Kite na an amarōwu kōdē, un myero imarē unu kenwu.

³⁵ Manōn bino mīō jō kībēc ngeo nī un ibedo ēlūbkōra, ka imarē unu kenwu.”

³⁶ Cimon Petero openyo Yecu nī, “Rwoth, in itye ka cīdhō yo kwene?”

Yecu ōgamō nī, “Kanya an acīdhō yo iē, in ba irōmō lūbō kōra kobedini, ēntō ibino lūbō kōra kinge.”

³⁷ Petero openyo ēn nī, “Rwoth, ngō na jūka mē lūbō kori kobedini? An abino jalō kwōna piri.”

³⁸ Cē Yecu ōgamō nī, “In adyer ibino jalō kwōni pīra? Adyer, an akobo nini nī, na thwōn gwēnō bara okok, in ibino kwērōna wang adek!

14

Yecu ōcūkō cwiny ēlūbkōrē

¹ “Kūr ibed unu kī par ī cwinywu. Yee unu ī kom Obanga; yee unu ī koma thon.

² Ī ōt k'Apapna tye iē kabedo na pol; ka onwongo ba obedo nī kōmanōn, kono an ba akobo niwu. An acīdhō kunōn mē yūbō niwu kabedo.

³ Ka an acīdhō mē yūbō kabedo niwu, cē an abino dwogo mē ōmōwu yo botha, ēk kanya an abedo iē un thon ibed iē.

⁴ Un ingeo yoo mē kanya an acīdhō yo iē.”

Yecu ēnē Yoo mē cīdhō yo both Apap

⁵ Tomaci okobo nīnē nī, “Rwoth, wan ba engeo kanya in ibino cīdhō yo iē. Wan ētwērō ngeo yoo nīngō?”

⁶ Yecu ōgamō nī, “An ēnē yoo, kōp adyer ēka kwō. Ngat mōrō ope na twērō cīdhō both Apap ka ba owok kī botha.

⁷ Ka adyer onwongo ingea unu, onwongo itwērō unu ngeo Apapna thon. Cakērē kobedini, ingeo unu ēn ēka dong īnēnō unu ēn.”

⁸ Pilipo okobo nī, “Rwoth, nyuth nīwa Apap; cē manōn nwongo ōrōmō kī bothwa.”

⁹ Yecu ōgamō nī, “Pilipo, an dong arii kodwu pī karē na lac. In bara ingea? Ngat mōrō n'ōnēna, nwongo dong ōnēnō Apap. Ngō na mīō in dōkī ikobo nī, ‘Nyuth nīwa Apap’?”

¹⁰ In bara iyee nī an atye ī Apap, ēka nī Apap tye ī an? Kōp na an akobo bothwu ba obedo kōpna kēna, ēntō Apap na bedo ī an ēnē tio tic mērē.

¹¹ Yee unu ka an akobo nī an atye ī Apap ēka Apap tye ī an; onyo ka ba iyee unu, cē iyee unu pī tango na un īnēnō an atio.

¹² Adyer an akobo niwu, ngat na yee ī koma ēn thon bino tio tic na an atio. Ēn bino tio tic na dōngō na lōō man, pīēn an acīdhō yo both Apap.

¹³ Gīn na kībēc na un ibino kwaō kī nyīnga, an abino tīmō ēk Wod oketh dheo ī kom Apap.

¹⁴ Ka ibino unu kwaō gīn mōrō kī nyīnga, an abino tīmō.

Yecu ōcīkō mē oro Tipo Naleng

¹⁵ “Ka īmara unu, ibino unu gwōkō cīkna.

¹⁶ An abino kwaō Apap, cē ēn bino mīōwu Akōny nōkēnē na bino bedo kodwu naka naka—

¹⁷ na enë Tipo më köp adyer. Jö më lobo ba twërö gamö, piën gin ba twërö nënö ëka ngeo en. Un dong ingeo en piën en bedo kodwu ëka bino bedo i un.

¹⁸ An ba abino wëköwu calö ëthïnö kic; an abino dwogo bothwu.

¹⁹ Odong karë na nönök, jö më lobo ba dökï bino nënöna, ëntö un ibino nënöna. Piën an akwö, un thon ibino kwö.

²⁰ I nïnö nön un ibino ngeo ni an atye i Apapna, ëka un itye i an, kite na calö an atye i un.

²¹ Ngat na tye kï cikna ëka gwökögï, enë ngat na mara. Ngat na mara, Apapna bino marö en. An thon abino marö en ëka abino nyuthara bothe.”

²² Cë Yuda (pathï Yuda Ikariot) openyo en ni, “Rwoth, pïngö ibino nyuthiri bothwa ëntö pathï both jö më lobo?”

²³ Yecu ögamö ni, “Ka ngat mörö mara, en bino lübö pwonyna. Apapna bino marö en, wan ebino bino bothe ëka ebino yübö kabledowa ködë.

²⁴ Ngat na ba mara, ba bino lübö pwonyna. Köp ni na un iwinyo ba obedo mëga, ëntö obedo më k'Apap n'ora.

²⁵ “An atwakö köp ni kibëc na an pod atye kodwu.

²⁶ Ëntö Aköny—na enë Tipo Naleng, n'Apap bino oro kï nyïnga—bino pwonyowu kï köp kibëc ëka bino po wiwu kï köp kibëc na an akobo niwu.

²⁷ An awëkö niwu kuc; an amïöwu kucna. An ba amïöwu kite na jö më lobo mïö ködë. Kür ibed unu kï par i cwinywu, ëka kür ibed unu kï lworö.

²⁸ “Po unu i kom gin na an akobo niwu ni, ‘An abino cïdhö ökö ëka abino dwogo bothwu.’ Ka

adyer imara unu, kono cwinywu yom ni an atye ka cidhö yo both Apap, piën en dit löa ökö.

²⁹ Kobedini an akobo niwu na bara ötimërë, ëk ka bino timërë iyee unu.

³⁰ An ba abino twak kodwu pi caa na lac, piën alöc më lobo ni tye ka bino. En ope ki twër i koma,

³¹ ëntö jö më lobo myero onge ni an amarö Apap ëka ni an atimö gin n'Apap öcika ni atim kikome.

“Yaa unu malö; ëk ecidh unu.”

15

Yecu enë ölöc më adyer

¹ Yecu okobo ni, “An abedo ölöc më adyer, ëka Apapna obedo apur.

² En tongo janga kibëc na ba nyakö nyige, ëntö lwërö janga kibëc na nyakö nyige, miö bedo na leng, ëk ömii önyak nyige na pol.

³ Un dong etyeko miöwu bedo na leng pi köp na an atwakö bothwu.

⁴ Bed unu i an, ëka an abino bedo i un. Jang yath mörö ope na twërö nyakö nyige kënë ka ba tye i kom ölöc. Kömanön thon un ba itwërö nyakö nyig ka ba ibedo unu i an.

⁵ “An abedo ölöc, un ibedo jangë. Ngat na bedo i an ëka an i en, en bino nyakö nyige na pol; piën ba itwërö unu timö gin mörö abonge an.

⁶ Ka ngat mörö ba bedo i an, ebolo en ökö calö jang yath ëka thwö. Koth jangë ni ecökö, ebologi i mac ëka ewangö ökö.

⁷ Ka ibedo unu i an ëka köpna bedo i un, peny unu gin na kibëc na un imitö, cë ebino miöwu.

⁸ Ka inyakö unu nyig na pol, un ibedo elübköra adyer. Man bino ketho dheo i kom Apapna.

⁹ “Kite na calö Apap ömara, an thon amaröwu kömanön. Bed unu i marna.

¹⁰ Ka igwökö unu cikna, ibino bedo unu i marna, kite na calö an agwökö ki cik k'Apapna, ëka an abedo i mar mërë.

¹¹ An akobo köp ni bothwu ëk yom cwinya obed i un, ëk yom cwinywu opong.

¹² Man ënë cikna: Marë unu kenwu, kite na an amaröwu ködë.

¹³ Ngat mörö ope na tye ki mar na dit na löö man—ni dhanö jalö kwö mërë pi nyikonei mërë.

¹⁴ Un ibedo nyikoneina ka itio unu gin na an aciköwu.

¹⁵ An ba dök acwodowu ni ibedo unu etic, piën atic ba ngeo gin n'adwong mërë tio. Ëntö an acwodowu ni nyikoneina, piën gin na kibëc na an awinyo ki both Apapna, atyeko dong miöwu ngeo.

¹⁶ Pathi un ënë iyëra, ëntö an ayëröwu ëka akethowu ëk icidh inyak unu nyigwu na bedo naka naka. Cë Apap bino miöwu gin mörö kékën na un ibino penyo ki nyinga.

¹⁷ Man ënë cikna: Marë unu kenwu.

Jö më lobo ödagö ëlëbkör Yecu

¹⁸ “Ka jö më lobo ödagöwu, nge unu ni gin öcakö dagöna.

¹⁹ Ka un ibedo më lobo, jö më lobo onwongo twërö maröwu na calö jögë. Kite na tye ködë, un ba ibedo më lobo, ëntö ayëröwu ki i lobo, pi manön ënë ömiö jö më lobo dagöwu.

²⁰ Po unu i kom köp na an atwakö bothwu ni: ‘Atic mörö ope na löö adwong mërë.’ Ka gin oyela, un thon ebino yelowu. Ka gin owinyo pwonyna, gin thon bino winyo mewu.

²¹ Gîn bino tîmō ï komwu kōmanōn pî nyînga, piën ba ngeo gîni ngat n'oorā.

²² Ka onwongo an ba abino ëka atwak ködgi, onwongo bal mörö ope na twërö bedo ï komgi. Ëntö kobedini, balgi kibëc tye ï wigi.

²³ Ngat na daga, nwongo dagö Apapna thon.

²⁴ Ka onwongo an ba atio ï kin-gi tic na dhanö mörö nökenë ba ötimö, onwongo ba twërö gîni bedo ki bal. Ëntö kobedini, gîn önönö tango ni gîni ëka pod ödaga gîni kanya acël k'Apapna.

²⁵ Ëntö man ötimërë ëk köp n'ëcöo ï Cîkgi ocobere ni: 'Ödaga gîni abonge köp mörö.'

²⁶ "Ëntö an abino oro niwu Aköny, Tipo më köp adyer. Ën bino bino bothwu nakun yaa ki both Apap ëka bino müö caden ï koma.

²⁷ Un thon myero imii unu caden ï koma, piën ibedo unu botha cakërë ki ï acaki.

16

¹ "An atyeko kobo köp ni kibëc bothwu ëk kür iwëk unu yeewu ökö.

² Gîn bino ryëmöwu ökö ki ï cinagoga, adyer karë tye ka bino na jö kibëc na nekowu bino thamö gîni ni etye ka tic pi Obanga.

³ Gîn bino tîmō man ï komwu piën ba ongeo gîni Apap, kadî thon an.

⁴ Ëntö an akobo niwu köp ni gîni, ëk ka karë bino thuno, un ibino po ië ni an akobo niwu cön. An ba akobo niwu köp ni ï acaki piën an onwongo pod atye kodwu.

Tic ka Tipo Naleng

⁵ “Kobedini an atye ka cīdhō yo both ngat n'oora, ēka ngat mōrō acēl kī kinwu ope na penya nī, ‘In itye ka cīdhō yo kwene?’

⁶ Cwinywu opong kī kumo piēn akobo niwu köp ni gīnī.

⁷ Ēntō an atye ka kobo niwu köp adyer: Obedo pī bēn na mewu ka an acīdhō, piēn ka an ba acīdhō, Akōny ba bino bino bothwu; Ēntō ka an acīdhō, an abino oro ēn yo bothwu.

⁸ Ka Akōny obino, ēn bino nyutho both jō mē lobo köp ī kom bal ēka köp ī kom kite atīr, ēka köp ī kom ngölō-köp:

⁹ na lübērē kī köp ī kom bal, piēn gīn ba yee gīnī ī koma;

¹⁰ na lübērē kī köp ī kom kite atīr, piēn an atye ka cīdhō yo both Apap, kanya un ba dōkī ibino nēnōna;

¹¹ na lübērē kī köp ī kom ngölō-köp, piēn alōc mē lobo ni dong etyeko ngölō köp nīnē ōkō.

¹² “An pod atye kī köp na pol na myero akob bothwu, Ēntō ba itwērō unu nīang iē kobedini.

¹³ Ka Tipo mē adyer obino, ēn bino tēlōwu ī köp mē adyer kībēc. Ēn ba bino twak pīrē kēnē; Ēntō ēn bino twakō gin na kībēc na ēn bino winyo kēkēn. Ēn bino kobo niwu gin na bino tīmērē ī karē mē anyim.

¹⁴ Ēn bino ketho dheo ī koma, piēn bino kwanyō köp na an akobo, ēka bino kobo niwu.

¹⁵ Gin na kībēc n'Apapna tye kōdē obedo mēga. Man ēnē ōmīō an akobo nī Tipo bino kwanyō kī kom man obedo mēga ēka bino kobo niwu.”

Cwer cwiny bino lökëre dökö yom cwiny

¹⁶ Yecu ömëdërë më kobo nî, “Odong karë na nönök, ba dökî ibino unu nënöna, ëka kinge karë na nönök, un ibino nënöna.”

¹⁷ Ëlëbkör Yecu mökö öcakö twak î kin-gî kën-gî nî, “Ngö na ën tye ka kobo both onu nî, ‘Odong karë na nönök, ba dökî ibino unu nënöna, ëka kinge karë na nönök, un ibino nënöna,’ ëka ‘Pïën an atye ka cîdhö yo both Apap’?”

¹⁸ Gîn ömëdërë më penyo nî, “Tyën köp î kom ngö na ën tye ka kobo nî, ‘karë na nönök’? Wan ba etye ka niang î kom gin na ën tye ka twak ië.”

¹⁹ Yecu ongeon nî gîn onwongo mitö penyo ën î kom köp nî, ömïö ën okobo bothgî nî, “Un itye ka penyere kenwu pî köp na an akobo bothwu nî, ‘Odong karë na nönök, ba dökî ibino unu nënöna, ëka kinge karë na nönök, un ibino nënöna’?”

²⁰ Adyer an akobo niwu nî un ibino kok ëka ikumo unu nakun jö më lobo cwinygî yom. Un ibino bedo kî cwer cwiny, ëntö cwer cwinywu bino lökëre dökö yom cwiny.

²¹ Ka dhakö mitö nywöl, cakö bedo k'arem, pïën caa mëre nwongo dong örömö; ëntö ka dong önywöl ökö, wie wil î kom arem pïën cwinye nwongo yom pî nywölö athîn î lobo.

²² Kobedini, un itye kî cwer cwiny, ëntö an abino nënöwu dökî, cë cwinywu bino bedo na yom, ëka ngat mörö ope na bino kwanyö yom cwinywu kî bothwu.

²³ Î nînö nön un ba ibino kwaö gin mörö kî botha. Adyer an akobo niwu nî Apapna bino mïöwu gin mörö këkën na un ikwaö kî nyînga.

24 Më thuno naka tin un ba ikwaö gin mörö kī nyīnga. Kwa unu ēka ibino unu nwongo, cē ibino pong unu kī yom cwiny.

25 “An atwakö köp ni bothwu kī carolok, karē tye ka bino na an ba dōkī abino twak kodwu kī koth lēb ni, ěntō an abino kobo bothwu kanya leng köp ĩ kom Apapna.

26 ĩ nīnō nōn ibino unu kwaö kī nyīnga. An ba atye ka kobo nī abino kwaö Apap na kakarwu,

27 piēn Apap kikome marōwu, piēn un thon ĩmara, ēka iyee unu nī an aya kī both Apap.

28 An aya kī both Apap, ēka an abino ĩ lobo; kobedini an dong atye ka wēkö lobo, ēka atye ka dōk cen yo both Apap.”

29 Cē ělūbkör Yecu okobo gīnī nī, “Kobedini in itye ka twak kanya leng, ēka abonge carolok.

30 Kobedini wan engeo nī in ingeo gin na kībēc, ēka ba dōkī ĩmītō nī ngat mörö openyi kī peny. Man miō wan eyee nī in ĩya kī both Obanga.”

31 Yecu ögamō nī, “Un dong iyee?

32 Karē tye ka bino ēka dong othuno ökö, na un ibino kēth ökö, ngat acēlacēl yo pacō mērē. Un kībēc ibino wēköna kēna. ěntō an ba atye kēna, piēn Apapna tye kanya acēl köda.

33 “An akobo köp ni kībēc bothwu, ěk ibed unu kī kuc ĩ an. ĩ lobo ni itye unu kī can. ěntō dīi unu cwinywu! An dong alöö lobo ökö.”

17

Lēga ka Yecu

¹ Kinge na Yecu otyeko kobo köp ni, ěn otingo wangē malō ĩ polo ēka ölēgō nī:

“Apap, karë dong örömö. Keth dheo i kom Wodi, ëk Wodi thon oketh dheo i komi,

² piën in imiö ën twër i kom jö kibëc, ëk ën ömii kwö na ba thum both jö kibëc na in imiö bothe.

³ Man ënë kwö na ba thum: ëk ongei gini nï in keni ënë ibedo Obanga më adyer, ëka onge gini Yecu Kiricito na in ioro.

⁴ An atyeko ketho dheo i komi i lobo, nakun acobo tic na in imia nï an atim.

⁵ Ëka kobedini, Apap, keth dheo i koma i nyimi, kanya acël kï dheo n'onwongo atye ködë i nyimi na bara lobo öcakërë.

Yecu ölägö pi ëlückörë

⁶ “An atyeko nyutho nyingi both jö na in imia kï i lobo. Gin onwongo obedo megï; in imiögï botha ëka gin ögwökö köpni.

⁷ Kobedini gin ngeo nï jami kibëc na in imia öya kï bothi,

⁸ piën an amiögï köp na in imia, ëka gin ögamö. Gin onge na bër nï an aya kï bothi, ëka oyee gini nï in iora.

⁹ An alögö pïrgï. An ba alögö pi jö më lobo ëntö pi jö na in imia, piën obedo gini megï.

¹⁰ Jö kibëc na an atye ködë obedo megï, ëka jö kibëc na in itye ködë obedo mëga ëka eketho dheo i koma pïrgï.

¹¹ An kobedini atye k'aya kï i lobo, ëntö gin pod tye i lobo, ëka an atye ka bino bothi. Apap Naleng, gwökgï kï tükö më nyingi—nyingi na in cön imia, ëk obed gini acël kite na calö ön etye acël.

¹² I karë na an atye ködgï kanya acël, an agwokogï na bër kï tükö më nyiing nön na in imia. Ba

tye ngat mörö n'orwenyo kī kin-gī, na path kī ngat na myero orweny, ëk Cöc na Leng ocobere kakarë.

¹³ “An atye ka bino yo bothi kobedini, ëntö an akobo köp ni gīnī nakun nwongo pod atye i lobo, ëk obed gīnī kī yom cwiny na mëga n'opong i cwinygī.

¹⁴ An atyeko mīögī köp na megī ëntö jö më lobo ödagögī, piën gīn ba obedo më lobo ni, na calö an ba abedo më lobo.

¹⁵ An ba akwaö nī myero ikwanygī ökö kī i lobo, ëntö nī igwökgī kī i kom ngat na rac.

¹⁶ Gīn ba obedo më lobo, kite na calö an ba abedo më lobo.

¹⁷ Mīīgī obed na leng kī köp adyer; köpni ënë adyer.

¹⁸ Kite na calö in iora i lobo, an thon aorogī i lobo.

¹⁹ An abedo na leng pīrgī, ëk ëmīīgī thon obed na leng i adyer.

Yecu ölēgö pī jö n'oye kībēc

²⁰ “An ba alögö pī jö ni kēkēn, ëntö alögö pī jö na bino yee i koma pī köpgī.

²¹ An alögö nī gīn kībēc obed gīnī acël, Apap, kite na calö in itye i an ëka an atye i in. An thon alögö nī gīn kībēc obed i ön, ëk jö më lobo oye gīnī nī in iora.

²² An amīögī dheo na in iketho i koma, ëk gīn obed acël na calö ön etye acël:

²³ An i gīn ëka in i an. Myero obed gīnī acël adyer, ëk jö më lobo onge nī in ënë iora ëka in imarögī kite na in imara ködë.

²⁴ “Apap, an amütö nī jö na in imīögī botha ëk obed gīnī kanya an atye ië, ëka önën gīnī dheona,

dheo na in iketho i koma piën in imara na bara ecweo lobo.

²⁵ “Apap na kite atir, kadî bed ni jö më lobo ba ngei, ëntö an angei, ëka ëlëbköra ngeo gini ni in ënë iora.

²⁶ An amiö nyingi ongere bothgi ëka an abino mëdara më miö nyingi ngere ëk mar na in imara ködë obed i gin, ëka an thon abed i gin.”

18

Ëmakö Yecu

¹ I karë na Yecu otyeko lëga, ën öya öcïdhö kanya acël k'ëlëbkörë ëka öngölö gini ora më Kidron. Pwodho* onwongo tye kunön, ëka Yecu k'ëlëbkörë ödönyö gini ië.

² Yuda, n'oketho örörö i kome, onwongo ngeo kabedo nön, piën wang na pol, Yecu k'ëlëbkörë onwongo marö cökërë gini kunön.

³ Ëlamdhök na dito ëka Eparicayo onwongo ömïö gini Yuda lwak acikari ëka acikari më öt k'Obanga më woth ködë. Gin öcïdhö kunön nakun ömakö gini tara, mac raa ëka jami lwëny.

⁴ Yecu, n'onwongo ngeo gin na kibëc na bino timërë i kome, öcïdhö bothgi ëka openyogi ni, “Nga na un itye ka rangö?”

⁵ Gin ögamö ni, “Yecu më Najaret.”

Yecu ögamö ni, “An ënë ën.” (Yuda n'oketho örörö i kome, onwongo ocung kanya acël ködgi.)

⁶ I karë na Yecu okobo nigî ni, “An ënë ën,” ojer gini ki ngeegi, ëka opodho gini piny.

* **18:1 18:1 Pwodho** Man onwongo obedo pwodho yen jeituni.

⁷ Cē Yecu dōkī openyogī nī, “Nga na un itye ka rangō?”

Gīn ögamō nī, “Yecu mē Najaret.”

⁸ Yecu ögamō nī, “An akobo niwu nī, ‘An ënë ën.’ Ka un itye ka rangōna, cē mīi unu jō ni öcīdhī.”

⁹ Man ötimērē ëk köp na ën ötwakö ocobere kakarē nī: “An ba arwenyo ngat mörö acël kī kin jō kibēc na in imīa.”

¹⁰ Cē Cimon Petero n'onwongo ömakö pala abadē, öwödhö ëka otongo kī ith opii k'Alamdhök na Dit, onguno ithe mē kucem ökö. (Nyīng opii nōn onwongo ecwodo nī Maliko.)

¹¹ Yecu okobo both Petero nī, “Dwök pala abadēni i akūrarö mērē. In ithamö nī an myero kür amadh ekopo n'Apap ömīa?”

Yecu i nyim Alamdhök na Dit

¹² Cē lwak acikari, aditgī ëka acikari mē öt k'Obanga, ömakö gīnī Yecu, cē otweo gīnī ën.

¹³ Gīn öcakö tero Yecu both Anac n'onwongo Kayapa Alamdhök na Dit önyömö nyarē.

¹⁴ Kayapa ënë onwongo obino ömīö thama both ëtëla k'Eyuda nī bër ka dhanö mörö acël öthöö pī jīl.

Petero ökwörö Yecu

(Matayo 26:69, 70; Marako 14:66-68; Luka 22:55-57)

¹⁵ Cimon Petero ëka alübkör Yecu nökenë onwongo tye ka lübö gīnī kör Yecu. Alübkör Yecu nī onwongo ngere both Alamdhök na Dit, ömīö ën ödönyö i dyekal k'Alamdhök na Dit kanya acël kī Yecu,

¹⁶ ëntö Petero ocung yökö kî dhö wangkac. Cë alübkör Yecu nön n'onwongo ngere both Alamdhök na Dit, ödök cen yökö, ötwak kî nyakö na gwökö dhö wang kac, ëka ën ömiö Petero ödönyö i dyekal.

¹⁷ Nyakö n'onwongo gwökö dhö wang kac openyo Petero ni, "In thon ba ibedo ngat acël n'obedo alübkör dhanö ni?"

Petero ögamö ni, "An ba abedo."

¹⁸ Etic ëka acikari onwongo omoko gîni mac piën piñy onwongo ngic, cë ocung gîni nakun etye ka oo mac më miö komgi bedo na lyeth. Petero thon onwongo ocung kanya acël ködgi ka oo mac.

Alamdhök na Dit openyo Yecu

(Matayo 26:59-66; Marako 14:55-64; Luka 22:66-71)

¹⁹ Alamdhök na Dit openyo Yecu köp i kom ëlübkörë, ëka pwony mërë.

²⁰ Yecu ögamö ni, "An atwak kanyalër both jö më lobo. An ninö kibëc abedo ka pwony i cinagoga onyo i öt k'Obanga, kanya Eyuda kibëc cökërë gîni ië. An ba akobo gin mörö i müng.

²¹ Pingö in itye ka penyona? Peny jö n'owinyo gîni köpna. Gin ngeo ngö na an akobo."

²² I karë na Yecu ötwakö köp ni, ngat acël kî kin acikari n'ocung i ngete, odhongo lem Yecu, nakun kobo ni, "Man ënë kite na in igamö kî köp k'Alamdhök na Dit?"

²³ Yecu ögamö ni, "Ka an atwakö gin mörö na rac, nyuth caden më gin na rac, ëntö ka an atwakö köp adyer, pingö in idhonga?"

²⁴ Cē Anac ödwökö Yecu na pod etweo yo both Kayapa, Alamdhök na Dit.

Petero dökī ökwөрö Yecu
(*Matayo 26:71-75; Marako 14:69-72; Luka 22:58-62*)

²⁵ Cimon Petero onwongo pod ocung kunön oo mac. Gīn openyo ěn nī, “In ba ibedo ngat acēl i kin ělūbkörē?”

Petero ökwөрö ökö, nakun kobo nī, “An ba abedo.”

²⁶ Ngat acēl i kin opii k'Alamdhök na Dit, wat ka dhanö na Petero onguno ithe, openyo ěn nī, “An ba aneni kanya acēl ködē i pwodho?”

²⁷ Petero dökī ökwөрö ökö, cē cūcūth thwön gwēnō öcakö kok.

Yecu i nyim Pilato
(*Matayo 27:1-2, 11-14; Marako 15:1-5; Luka 23:1-5*)

²⁸ Kodiko cön, Eyuda ökwanyö Yecu kī i öt ka Kayapa, ěka otero gīnī i pacö k'adit mē Roma. Jö n'odotho Yecu ba ödönyö gīnī iē piēn onwongo mīögī ěbal ökö, ěka mīögī ba ekwero nīnō mē Poth.

²⁹ Cē Pilato odonyo yökö bothgī, ěka openyogī nī, “Tyēn köp mēnē na un i dotho kī dhanö nī?”

³⁰ Gīn ögamö nī, “Ka onwongo dhanö nī ba ötīmō gin na rac, onwongo wan ba ekelo ěn yo bothi.”

³¹ Pilato okobo nīgī nī, “Un kikomwu ěnē iter unu ěn, ěka ingöl unu nīnē köp na lübö cīk na mewu.”

Ētēla k'Eyuda ögamö nī, “Wan ba etye kī twēr mē ngölö thöō i wi ngat mörö.”

³² Man ötīmērē mē cobo köp na Yecu onwongo ötwakö na nyutho kit thöō na ěn bino thöō ködē.

³³ Cē Pilato ödök cen i Praitōrion† ēka openyo Yecu nī, “In ēnē ibedo rwoth k'Eyuda?”

³⁴ Yecu ögamö nī, “In itye ka kobo köp ni piri keni, onyo jö nököñē ēnē okobo nini köp i koma?”

³⁵ Pilato ögamö nī, “In ithamö nī an abedo Ayuda? Jö na megi ēka ēlamdhök na dito ēnē okeli gīnī botha. Ngö ēnön na in itīmō?”

³⁶ Yecu ögamö nī, “Kerna ba obedo më lobo ni. Ka onwongo kerna obedo më lobo ni, ēlūbkōra onwongo twērö gīnī lwēny më jükö etēla k'Eyuda kür ömaka gīnī. Ēntö kerna ba obedo më lobo ni.”

³⁷ Pilato openyo ēn dökī nī, “Cē in ibedo rwoth?”

Yecu ögamö nī, “In ikobo nī an abedo rwoth. Pī tyēn köp ni ēnē ömīö ēnywōla, ēka pī tyēn köp ni ēnē ömīö an abino i lobo më moko caden pī köp adyer. Jö kibēc më adyer winyo gīnī dwōna.”

³⁸ Pilato openyo ēn nī, “Adyer ēnē ngö?” Ka okobo köp nī, cē ödönyö yökö dökī both Eyuda, ēka okobo nī, “An ba anwongo köp mörö i kome.

³⁹ Ēntö obedo kite më thēkwarö bothwu nī myero an agöny niwu amabuc acēl i karē më Poth. Un imītö nī an agöny niwu ‘rwoth k'Eyuda’?”

⁴⁰ Gīn ögamö kī wöö nī, “Pathī ēn! Mīiwa Baraba!” Baraba onwongo obedo ayak.

19

Ēngölö thöö i wi Yecu

¹ Pilato otero Yecu, ēka ömīö twērö nī ēk epwod ēn kī del.

† **18:33 18:33 Praitōrion** Man obedo pacö k'alöc na dit.

² Acikari ocweo gĩnĩ tok öküdhö ëka oketho gĩnĩ i wie. Gĩn oketho böngü na kwar i kome

³ ëka öcĩdhö gĩnĩ bothe nakun kobo gĩnĩ nĩ, “Örēm, rwoth k'Eyuda!” Odhongo gĩnĩ Yecu.

⁴ Pilato dökĩ öcĩdhö yökö, ëka okobo both ëtëla k'Eyuda nĩ, “Nën, an atye ka kelo ën yökö yo bothwu, ëk inge unu nĩ an ba anwongo köp mörö i kome.”

⁵ I karë na Yecu odonyo yökö bothgĩ n'oruko tok öküdhö ëka kĩ böngü na kwar, Pilato okobo nĩgĩ nĩ, “Nën unu, dhanö ni ene!”

⁶ I karë n'ëlamdhök na dito ëka acikari më öt k'Obanga önënö gĩnĩ ën, gĩn öwöö nĩ, “Gur ën i kor yath! Gur ën i kor yath!”

Ëntö Pilato ögamö nĩ, “Un iter ëka igur unu ën i kör yath, piën an ba anwongo köp mörö i kome.”

⁷ Ëtëla k'Eyuda ögamö gĩnĩ nĩ, “Wan etye kĩ cĩk, ëka na lübërë kĩ cĩk nön, ën myero öthöö, piën ën tye ka kobo nĩ ën ebedo Wod k'Obanga.”

⁸ I karë na Pilato owinyo köp ni, ën obedo kĩ lworo rwök,

⁹ ëka ödök cen i Praitorion.* Ën openyo Yecu nĩ, “In iya kĩ kwene?” Ëntö Yecu ba ögamö dhögë.

¹⁰ Ömöö Pilato okobo nĩnë nĩ, “In ikwërö twak köda? In ba ingeo nĩ an atye kĩ twër më gönyöni, onyo më guro nĩ i kor yath?”

¹¹ Cë Yecu ögamö nĩ, “In onwongo ba itwërö bedo kĩ twër i koma ka onwongo ba emii kĩ i polo. Pi manön ngat n'ömia bothi tye kĩ bal na dit rwök.”

* 19:9 19:9 **Praitorion** Man obedo pacö k'alöc n'adit.

¹² Cakërë i karë nön, Pilato ötëmö më gönyö Yecu, ëntö ëtëla k'Eyuda ömëdërë më wöö nï, “Ka in igönyö dhanö ni, cë in ba ibino bedo okone ka Cija. Dhanö mörö na kethere kënë më bedo rwoth, nwongo pyem ki Cija.”

¹³ I karë na Pilato owinyo köp ni, ën okelo Yecu yökö, cë obedo i wi then më ngölö-köp i kabedo n'ëcanö kite ië, (i lëb Iburu ecwodo nï Gabbata.)

¹⁴ Nïnö nön onwongo obedo nïnö më Yübërë më Poth, caa abicël onwongo cwök.

Pilato okobo both ëtëla k'Eyuda nï, “Nën unu, rwothwu enene!”

¹⁵ Cë gïn öwöö nï, “Nek ën ökö! Nek ën ökö! Gur ën i kor yath ariä!”

Pilato openyogï nï, “An myero agur rwothwu i kor yath ariä?”

Ëlamdhök na dito ögamö gïni nï, “Wan epe ki rwoth mörö, na path ki Cija këkën.”

¹⁶ Cë Pilato ömïö Yecu bothgï ëk ogur gïni ën i kor yath ariä.

Guro Yecu i kor yath ariä

(Matayo 27:32-44; Marako 15:21-32; Luka 23:26-43)

Cë gïn otero Yecu yökö,

¹⁷ nakun otingo yath ariä mërë, ën öcïdhö yo kabedo n'ecwodo nï “Kabedo më Cogo Wic” (i lëb Iburu ecwodo nï Golgota.)

¹⁸ Kunön ënë gïn oguro Yecu i kor yath ariä, ki jö ariö nökenë—ngat acël i nget Yecu kucël, ëka ngat acël kucël nakun Yecu tye i dyere.

¹⁹ Pilato onwongo öcöö köp n'eguro i wi yath ariä na kwanëre ni: "YECU MË NAJARET, RWOTH K'EYUDA."

²⁰ Eyuda na pol ökwanö gini köp ni, piën kabedo n'onwongo eguro Yecu ië onwongo tye na cwök ki pacö na dit, ëka köp ni onwongo ëcöö i lëb Iburu, i lëb Latin, ëka i lëb Girik.

²¹ Ëlamdhök na dito k'Eyuda ökwërö gini both Pilato ni, "Kür icöö ni, 'Rwoth k'Eyuda,' ëntö cöö ni, 'Dhanö ni okobo ni, an abedo rwoth k'Eyuda.' "

²² Pilato ögamö ni, "Gin na an acöö, an acöö dong ökö."

²³ Kinge na dong acikari otyeko gini guro Yecu i kor yath ariä, ökwanyö gini böng mërë, cë opoko gini i dul angwën, dul acël pi acikari acëlacël, ëka böngü mërë më ië odong. Böngü ni onwongo ba ëkwö akwöa, ëntö ecweo acwea cakërë ki malö naka piny.

²⁴ Gïn ötwak i kin-gi kën-gi ni, "Eru kür eyecu, ëntö eru ebol kwir ëk ënën nga na bino tero."

Man ötimërë ëk Cöc na Leng ocobere na kobo ni,
"Gïn opoko böngna i kin-gi,

ëka obolo gini kwir pi böngüna."

Cë acikari ötimö kite na gïn omoko ködë.

²⁵ Jö n'ocung i nget yath ariä ka Yecu ene, aya ka Yecu, amïn aya ka Yecu, Maria dhakö ka Kelopa, ëka Maria më Magadala.

²⁶ I karë na Yecu önënö aya mërë k'alübkörë na ën marö ocung gini i ngete kany nön, okobo both aya mërë ni, "Aya, wodi ene!"

²⁷ Cē okobo both alübkörē nī, “Nēn, ayani ene.” Cakērē ī caa nōn mē cīdhō kōdē anyim, alübkör Yecu nī otero ēn yo pacō mērē.

Thöö ka Yecu
(*Matayo 27:45-56; Marako 15:33-41; Luka 23:44-49*)

²⁸ Kinge, Yecu ongeō nī jami kibēc dong othum, ēka mē mīō Cōc na Leng cobere, Yecu okobo nī, “Örīō oneka.”

²⁹ Agulu kōngō ölöc na wac onwongo tye kunōn, gīn olutho amor ī kōngō ölöc na wac ēka ērwakō ī wī lūth, cē etingo malō eketho ī dhögē.

³⁰ Ī karē na Yecu öbīlō kōngō ölöc na wac, okobo nī, “Othum dong ökō.” Cē okulo wie ēka öthöö.

³¹ Nīnō nōn onwongo obedo nīnō mē Yübērē, ēka kodiko mērē onwongo dong bedo nīnō na pīrē tēk mē Cabīt k'Eyuda. Pīēn ētēla k'Eyuda onwongo ba mītō nī kom jō n'egurogī odong ī kor yath arīa ī nīnō mē Cabīt. Gīn ökwāō Pilato nī myero ētūr tyēn jō n'egurogī, ēka komgī ēkwany ökō pīny kī ī kor yath arīa.

³² Acikari obino gīnī, cē ötürō gīnī tyēn dhanō mē acēl n'onwongo eguro kī Yecu, ēka tyēn ngat nökēnē.

³³ Ēntō ka obino gīnī ī kom Yecu, onwongo gīnī nī ēn dong öthöö ökō, cē gīn ba dök ötürō tyēnē gīnī.

³⁴ Ēntō ngat acēl kī kin acikari öcöbō lak nget Yecu kī tōng, cē cücūth remo kī pii omolo.

³⁵ Ngat n'obino önēnō gīn n'ötīmērē obino ömīō caden, ēka caden mērē tye atīr. Ēn ngeo nī ēn ekobo köp adyer, ēka ēn mīō caden ēk un thon myero iye.

³⁶ Jami ni kibëc ötimërë ëk Cöc na Leng ocobere ni: “Cogo mërë mörö ba ebino türö,”

³⁷ ëka na calö Cöc na Leng nökenë kobo ni, “Gin bino nënö ngat na gin öcöbö.”

Eiko kom Yecu i bur lyël

(Matayo 27:57-61; Marako 15:42-47; Luka 23:50-56)

³⁸ Kinge, Yocepu më Arimataya öcïdhö cë ökwaö Pilato kom Yecu. Yocepu onwongo obedo alübkör Yecu ëntö i müng pï lworö ëtëla k'Eyuda. Pilato ömiö ën twër, cë öcïdhö ökwanyö kom Yecu ökö piny.

³⁹ Yocepu onwongo owotho kanya acël kï Nikodemo, ëcwö n'obino öcïdhö both Yecu i kiwor. Nikodemo okelo müra n'erubo k'athakarac, na pëk mërë mitö romo kilo pyer adek wie angwën.

⁴⁰ Na lübërë kï kite më ik i thëkwarö k'Eyuda, gin otero kom Yecu ëka eboo kï böngü na leng, cë oketho ginï möö na ngwece kur.

⁴¹ Pwodho onwongo tye i kabedo n'eguro Yecu ië, ëka i pwodho nön onwongo tye ië bur lyël na nyen, na naka yam ngat mörö bara eiko ië.

⁴² Kite na nïnö nön onwongo obedo nïnö më Yübërë k'Eyuda, ëka bur lyël onwongo tye na cwök, gin opyelo kom Yecu kunön.

20

Cer ka Yecu

(Matayo 28:1-8; Marako 16:1-8; Luka 24:1-12)

¹ Kodiko cön i nïnö më acël më cabit na piny onwongo pod cöl, Maria më Magadala öcïdhö i bur lyël cë önënö ni ëkwanyö kidi ökö kï i dhö lyël.

² Ën obino na tye ka ngwëc both Cimon Petero ëka alübkör Yecu nökenë na Yecu onwongo marö, cë okobo nî, “Ökwanyö gîni kom Rwoth ökö kî i bur lyël. Wan ba engeo kanya gîn oketho ën ië!”

³ Cë Petero ëka alübkör Yecu nökenë nön, öcakö gîni cidhö yo bur lyël.

⁴ Gîn kibëc onwongo tye ka ngwëc kanya acël, ëntö alübkör Yecu nökenë nön oyomo Petero ökö ëka öcakö thuno i bur lyël.

⁵ Ën ogungo, ëka önënö i bur lyël, cë önënö böngü na leng na gîn oboo ën ködë odong kany nön, ëntö ba ödönyö i ië.

⁶ Cë Cimon Petero n'onwongo odong cen i nge, othuno ëka ödönyö i bur lyël. Ën önënö böng na leng n'onwongo eboo ën ködë odong kany nön,

⁷ nakun atam n'onwongo eumo kî wii Yecu onwongo ëdölö ökö ëka ba tye kanya acël kî böng na leng nökenë.

⁸ Cë alübkör Yecu nökenë nön n'öcakö thuno i bur lyël, ödönyö thon i ië. Ën önënö ëka oye.

⁹ (Gîn thon onwongo bara öniang gîni kî i kom Cöc na Leng nî Yecu myero ocer kî i kin jö n'öthöö.)

*Yecu onen both Maria më Magadala
(Matayo 28:9-10; Marako 16:9-11)*

¹⁰ Cë ëlübkör Yecu ödök gîni cen yo pecigî,

¹¹ ëntö Maria ocung yökö kî i bur lyël nakun kok. Na ën tye ka koko, ën ogungo pîny më nënö i bur lyël,

¹² ëka önënö emalaika ariö n'oruko gîni böng na tar. Gîn onwongo obedo kanya onwongo epyelo kom Yecu ië, acël i kuwie, ëka acël i kutyënë.

13 Gîn openyo ên nî, “Dhakö, pîngö in itye ka koko?”

Cê ên okobo nî, “Gîn ökwanyö kom Rwothna ökö, ëka an ba angeo kanya gîn oketho ên ië.”

14 Kinge na ên dong ötwakö köp ni, cê ölökerë ëka önënö Yecu ocung i nyime, ëntö ên ba ongeö nî Yecu onwongo ênön.

15 Yecu openyo ên nî, “Dhakö, pîngö in itye ka koko? Nga na in itye ka rangö?”

Ën öthamö nî gwök onyo ên obedo apur, ên öcakö kobo nî, “Adwong, ka in ënë iterö ên ökö, kob nîna kanya in iketho kome ië, ëk acidh akwany.”

16 Cê Yecu okobo nî, “Maria.”

Ën ölökerë yo bothe ëka okok kî lëb Iburu nî, “Rabbi!” (na gönyö nî Apwony.)

17 Yecu okobo nî, “Kür imaka, piën an bara adök yo both Apap. Ëntö apë both ëlëbköra, ëka ikob bothgî nî, ‘An atye ka dök yo both Apapna ëka Apapwu, both Obangana ëka Obangawu.’ ”

18 Maria më Magadala öcïdhö both ëlëbkör Yecu k'emuth ëka okobo bothgî nî: “An anënö Rwoth!” Ëka ên okobo nîgî nî Yecu okobo nî, jami ni kibëc.

Yecu onen both ëlëbkörë

(Matayo 28:16-20; Marako 16:14-15; Luka 24:36-49)

19 I kothyeno nön më nî, më acël më cabit, n'ëlëbkör Yecu onwongo tye gîni kanya acël, na dholokek kibëc eloro ökö pî lworo ëtëla k'Eyuda. Athura, Yecu onen ëka ocung i dyeregî cê okobo nî, “Kuc obed kodwu!”

20 Kinge na ên okobo köp ni, cê onyutho nîgî wang ret kî i cîngë ëka kî i lak ngete. Ëlëbkör Yecu

obedo gĩnĩ kĩ yom cwiny rwök ĩ caa na gĩn önönö Rwoth.

²¹ Yecu dökĩ okobo nĩgĩ nĩ, “Kuc obed kodwu! Kite n'Apap oora, an thon aorowu.”

²² ĩ karē na ěn okobo köp ni, cē oyweo ĩ komgĩ ěka okobo nĩ, “Gam unu Tipo Naleng.

²³ Ka ĩtĩmō unu kĩca ĩ bal ka jĩĩ, nwongo ětĩmō nĩgĩ kĩca; ěka ka ba ĩtĩmō unu kĩca ĩ balgĩ, nwongo ba ětĩmō kĩca nĩgĩ.”

Yecu onen both Tomaci

²⁴ Ngat acēl kĩ kin ělũbkör Yecu apar wie arĩö, Tomaci (n'ecwodo nĩ Rudi), onwongo ope bothgĩ ĩ karē na Yecu onen athura.

²⁵ ělũbkör Yecu nökēnē obino okobo nĩnē nĩ, “Wan ěnönö Rwoth!”

Ěntö Tomaci okobo nĩgĩ nĩ, “Thwara ka an anönö poo mē ěcũmarĩ kĩ ĩ cĩngē, ěka aketho nya cĩnga ĩ wang poo mē ěcũmarĩ, ěka aketho cĩnga ĩ lak ngete, an ba abino yee.”

²⁶ Kinge na nĩnō aboro opoth, ělũbkörē onwongo obedo gĩnĩ ĩ öt dökĩ, ěka Tomaci thon onwongo tye kanya acēl ködgĩ. Kadĩ bed onwongo eloro dholokek ökö, athura, Yecu onen ěka ocung ĩ dyeregĩ cē okobo nĩ, “Kuc obed kodwu!”

²⁷ Cē okobo both Tomaci nĩ, “Keth nya cingi kany; nēn cĩnga gĩnĩ. Ryē cingi ěka iketh ĩ ret mē lak ngeta. Wēk bedo k'akalakala ěka iye.”

²⁸ Tomaci okobo both Yecu nĩ, “In ibedo Rwothna ěka Obangana!”

²⁹ Cē Yecu okobo nĩnē nĩ, “Pĩēn in ĩnēna, ěnē ömĩö in iye; tye gĩnĩ kĩ gum jö na ba önēna ěka pod oyee gĩnĩ.”

³⁰ Yecu otio anyuth më tango na pol i nyim ëlëbkörë, na ba ëcöögï i buk ni.

³¹ Ëntö man ëcöögï ëk iyee unu ni Yecu ënë Meciya, Wod k'Obanga, ëka pi yeewu i kome, ibino unu nwongo kwö i nyingë.

21

Yecu onen both ëlëbkörë abirö

¹ Kinge ninö na nönök, Yecu dökï onen both ëlëbkörë i dhö nam më Tiberia.* Ën onen bothgi ni köman:

² Cimon Petero, Tomaci (n'ecwodo ni Rudi), Nathanael më Kana më Galilaya, ëthinö ka Jebedayo, ëka ëlëbkör Yecu arïö nökënë onwongo tye ginï kanya acël.

³ Cimon Petero okobo nigï ni, “An acïdhö ka makö rëc.” Gin ögamö ni, “Wan ebino cïdhö kodi.” Cë öcïdhö ginï ëka ödönyö ginï i yeya, ëntö i kiwor nön gin ba ömakö gin mörö.

⁴ Kodiko cön na piny dong oruu, Yecu onwongo ocung i lak kulo, ëntö ëlëbkörë ba ongeö ginï ni Yecu onwongo ënön.

⁵ Ën openyogï ni, “Ëthinö, imakö unu rëc mörö?” Gin ögamö ni, “Wan ba ëmakö.”

⁶ Yecu okobo nigï ni, “Bol unu bööwu i cingwu kucem më yeya, cë ibino unu nwongo gin mörö.” I karë na gin ötimö, ywaö böö ölöögï ökö piën rëc onwongo pol rwök.

⁷ Cë alëbkör Yecu na ën onwongo marö okobo both Petero ni, “Manön Rwoth!” Cücüth na Cimon Petero owinyo ka ën kobo ni, “Manön Rwoth,”

* **21:1 21:1 Tiberia** Man obedo Nam më Galilaya.

öcakö ruko böng mërë, (piën onwongo ögönyögi ökö) ëka opye i pii.

⁸ Ëlübörë nökënë obino gini i yeya nakun ywaö gini böö n'opong ki rëc, piën gin onwongo ba bor ki lak kulo, na mitö römö mita pyer abungwën.

⁹ I karë na gin dong othuno i lak nam, önönö gini mac makaa kunön na lyël, n'eketho rëc i wie, ëka ogati.

¹⁰ Yecu okobo nigä ni, "Kel unu rëc mörö na un pod imakö unu amaka."

¹¹ Cë Cimon Petero öcakö dök cen ëka öidhö i yeya, öywaö böö, okelo i lak kulo. Rëc onwongo opong ië na pol, 153, ëntö kadä bed onwongo rëc pol rwök, böö ba öyëc.

¹² Yecu okobo nigä ni, "Bin unu i cem." Ëntö ba tye ngat mörö ki kin ëlübörë n'ödiö cwinye më penyo ën ni, "In ënë nga?" Piën gin ongeö ni manön ënë Rwoth.

¹³ Yecu obino, ëka ökwanyö ogati, cë ömïö bothgi, ëka ötimö ni kömanön thon ki rëc.

¹⁴ Man onwongo dong wang më adek na Yecu onen ködë both ëlübörë, kinge n'ecero ën ki i kin jö n'öthöö.

Yecu ëka Petero

¹⁵ Kinge na gin dong otyeko cem, Yecu openyo Cimon Petero ni, "Cimon wod ka Jon, in adyer imara na löö jö ni?"

Ën ögamö ni, "Eyo, Rwoth, in ingeo ni an amari."
Yecu okobo ni, "Kwa ëthinä romna."

¹⁶ Yecu openyo Petero dökä wang më arïö ni, "Cimon wod ka Jon, in adyer imara?"

Ën ögamö ni, "Eyo, Rwoth, in ingeo ni an amari."

Yecu okobo nī, “Gwök romna.”

¹⁷ Yecu openyo Petero wang mē adek nī, “Cimon wod ka Jon, in ĩmara?”

Petero ĩē öwang pĭen Yecu openyo ěn wang mē adek nī, “Cimon wod ka Jon, in ĩmara?” Cimon okobo nĭnē nī, “Rwoth, in ingeo jami kĭbēc; in ingeo nī an amari.”

Yecu okobo nī, “Kwa romna.

¹⁸ Adyer, akobo nini nī ĩ karē na in pod ibedo athĭn, itweo böngüni keni, ĩcĭdhö yo kanya in ĩmĭtö; ěntö ka dong itii, in ibino ryēö cingi gĭnĭ, cē ngat mörö nökēnē bino tweo nini böngüni, ěka bino teroni yo kanya in ba ĩmĭtö.”

¹⁹ (Yecu okobo köp nī mē nyutho kit thöö n'ebino ketho ĩ kome na Petero bino mĭö dheo ĩ kom Obanga.) Cē okobo nĭnē nī, “Lüb köra!”

²⁰ Petero ölökerē, ěka önēnö alübkör Yecu nön na ěn onwongo marö tye ka lübö körgĭ. (Man obedo ngat acēl n'onwongo obedo na cwök kĭ Yecu ĩ dhö cem mē kothyeno ěka onwongo okobo nī, “Rwoth, nga na bino ketho örörö ĩ komi?”)

²¹ ĩ karē na Petero önēnö ěn, cē openyo Yecu nī, “Rwoth, cē dhanö ni kono?”

²² Yecu ögamö nī, “Ka an amĭtö nī ěn obed na kwö naka ka an adwogo, manön ěnē ngö kĭ bothi? In myero ĩlüb köra.”

²³ Pĭ tyēn köp nī, ömĭö anĭi ökēth ĩ kin utmego nī alübkör Yecu nī ba bino thöö. ěntö Yecu ba okobo nī ěn ba bino thöö; ěntö Yecu okobo nī, “Ka an amĭtö nī ěn obed na kwö naka ka an adwogo, manön ěnē ngö kĭ bothi?”

²⁴ Man ënë alübkör Yecu n'okobo caden i kom köp ni, ëka n'öcöö köp ni gini piny. Wan engeo ni caden mërë na ën okobo tye atir.

Köp më ajiki

²⁵ Jami nökenë tye na pol na Yecu otio. Ka onwongo ëcöögï piny k'acëlacël, athamö ni kadï wi lobo thükül ba tye ki kabedo na römö buke n'ebino cöögï.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc. and SIL Uganda

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 2 Jul 2025 from source files dated 2 Jul 2025

61e7f4da-dc0f-50a1-9dae-64ee1b392d80